

元史新編

元史卷二十八

平蜀功臣

元代用兵未有如攻蜀之難者。蜀遠至繞行理萬餘程之
變近則頓兵釣魚山二十載之久。舍阿巴赤徑擣下游浮
江東下之良策而血戰於孤城峭壁之間。故余於攻蜀諸
將自阿巴赤之外無取焉。然以深入腹心之勁敵而不能
破。負隅之邊城亦從來守蜀者所未有。故不閱襄陽數載
之圍。不知孟琪保障之功。不閱合州重慶廿載之攻。不知
余玠設險之固。勞臣効績功在苞桑。千載若揭焉。至於舊
史所錄攻蜀諸將若張萬家奴若塔海帖木爾若王昔刺
若劉恩若石抹苟舊作石抹狗狗若忽都若探馬赤若旦只爾若
拜延若趙匣刺皆偏裨從事於劍涪巴瀘之間。動列專傳

則舊史之蕪爾今芟薙之以應史法

汪世顯

子德臣良臣 孫惟正

汪世顯字仲明鞏昌鹽川人系出旺古族仕金官至鎮遠軍節度使鞏昌便宜總帥金亡郡縣皆降世顯獨堅守及皇子闊端駐兵城下始率眾降皇子問何不早降對曰大軍迭至莫知適從惟殿下仁武不殺竊意必能保全闔城軍民是以降也皇子大悅命從南征斷嘉陵擣大安田楊諸蠻結陣迎敵與宋將曹友聞相犄角世顯單騎突之殺數十人黎明大軍四合擊斬友聞遂入武信進逼資普軍葭萌宋將依山爲柵世顯以數騎奪柵乘勝定資州略嘉定峨眉復東下次開州宋軍屯萬州南岸世顯卽水北造船以疑之夜從上游鼓革舟襲破之追奔至巫峽遇宋援

軍斬首三千明年還攻重慶會大暑乃罷歸覲太宗錫金符易其名曰中山辛丑宋帥陳隆之貽書請戰聲言有眾百萬皇子集諸將議之世顯請行率軍薄成都隆之戰屢卻堅壁不出其部曲田顯約夜降隆之覺之世顯曰事急矣亟梯城入斬隆之復簡精銳五百擣漢州州兵三千出戰城閉盡沒三日大軍至克其城癸卯春拜便宣總帥秦鞏等二十餘州賜虎符世顯旋卒追封隴西郡公諡義武延祐七年加封隴右王子七人

德臣其次子也賜名田哥字舜輔年十四入宿衛侍游獵矢無虛發襲父爵從攻蜀將前軍出忠涪所向克獲進攻運山所乘馬中飛石死步戰拔外城宋將余玠攻漢中德臣馳赴之玠聞遁去憲宗賜印符命城沔州沔據嘉陵要

路德臣繕治室廬部署官屬數日而集進攻嘉定還至左
綿雲頂進次隆慶宋軍連夜出斫營皆力戰破之又詔城
綿谷復立利州諸戍皆聽節制世祖以皇弟有事西南德
臣進見乞免利州賦稅及徭役漕糧屯田爲長久計卽命
置行部於鞏立漕司於沔給餽餉奏乞以兄忠臣攝府事
使已得專事利州利州爲蜀喉襟蜀人憚其威名諸郡環
視莫敢出鬪甲寅春旱嘉陵漕舟水涸議者欲棄蜀去德
臣曰國家以蜀事託我有死而已盡殺所乘馬饗士襲嘉
川得糧二千餘石雲頂呂遠將兵五千邀戰卽陣禽之復
得糧五千石旣而魚關金牛水陸運偕至屯田麥亦登食
用遂給夏獲宋將縱令持檄諭苦竹堡守將以城降所俘
城中民悉歸之東南戍卒數百有去志給券縱之皆泣謝

未幾山寨相繼輸款宋將余晦遣都統甘閏以兵數萬城
紫金山德臣選精卒銜枚夜襲破之苦竹堡復叛蜀兵二
萬來援大敗之獲糧百餘艘魚關至沔水迂回爲渡百有
八所至桴梁以濟戊午歲憲宗親征次漢中德臣朝行在
所初諸路軍成都猝爲宋人所圍德臣遣將赴之約曰先
破敵者奏領此城圍遂解詔候江南事定如約以城與之
帝幸綿谷駐北山以德臣立利州之功命立石紀之嘉陵
白水交會勢洶急德臣繫舟爲梁一夕而成如履坦途賜
白金三十斤仍命刻石紀功苦竹旣逆命至是攻之巖壁
峭絕或請建天橋德臣不然之旣而橋果無功乃率將士
魚貫先登帝望見歎曰何其身甚小而膽甚大也帝東下
德臣爲先鋒抵大獲山奪水門宋將楊大淵遣子乞活城

中人命引至帝前爲請旦日大淵率眾降已而運山青居大良皆降攻釣魚山守臣王堅負險五月不下德臣單騎至城下呼降語未既幾爲飛石所中遂感疾卒年三十有六追封隴西郡公諡忠烈弟良臣弱冠卽從兄出征爲前鋒以功擢裨帥兼便宜都府參議憲宗親征軍至六盤良臣還鞏昌主供億水陸無壅世祖卽位阿藍苔及渾都海逆命劫六盤府庫西垂騷動詔良臣討之軍營山丹按兵不戰者兩月俄大舉至耀碑谷兩軍相當良臣慷慨誓眾奮踊而前會大風揚沙晝晦殪其前鋒數十人乘勢衝之賊大潰獲阿藍苔渾都海捷聞賜金虎符權便宜都總帥中統二年平火里之叛轉同僉鞏昌路便宜都總帥宋將管萬壽帥戰艘二百泝江而上欲掩青居山城良臣伏甲

數十艘邀其後而身先逆戰萬壽敗走伏發幾獲之三年
授征南都元帥良臣以釣魚山險絕不可攻奏請就近地
築城以扼其往來四年春攻重慶命元帥康士圖先驅迎
戰而良臣塞其歸路兵旣交良臣引兵橫擊之斷敵軍爲
二敵走趨城不得入盡殪之至元九年授西川行樞密院
事十一年進攻嘉定咎萬壽堅守不出良臣大搜山谷果
得伏兵進壘薄城萬壽悉軍出戰大敗之伏尸蔽江萬壽
遂降良臣統兵順流而下紫雲瀘敘相繼款附還圍重慶
十三年敗宋涪州安撫王立救兵宋安撫張珩遣將乘虛
襲據瀘州良臣還軍平之十五年復與張珩鏖戰於重慶
身中四矢明日督戰益急珩部將開門納降四川悉平捷
聞世祖召良臣入覲授四川行中書省左丞賜白貂裘良

臣陳治蜀十五事世祖嘉納成都瘡痍之餘良臣極意循撫卒封梁國公子七人德臣子六人惟正最有名

惟正字公理好藏書從文士論議古今尤喜談兵時出游獵則勒從騎爲攻守狀襲父爵守青居山初憲宗遣渾都海以騎兵二萬守六盤又遣乞台不花守青居至是渾都海叛乞台不花發兵爲應惟正卽命力士縛殺之世祖嘉其功詔東川軍事悉聽處分中統三年鞏昌部長火都叛蕃戎悍銳惟正恐賊鋒不可驟犯乃堅壘扼其前旁撓以奇兵賊欲戰不得休則復撓之如是兩月知其糧盡勢蹙始出戰屢捷火都佯遣三十人來約降卽遣其十人還俾火都自來因潛兵躡其後出不意禽殺之至元七年宋人修合州詔立武勝軍以拒之惟正臨嘉陵江作柵扼其水

道夜懸鐙柵閒編竹爲籠中置火炬順地勢轉走照百步以防不虞宋人知有備不敢近九年帥兵掠忠涪破寨七禽守將六降戶千六百有奇捕虜五百會丞相伯顏克襄陽議取宋惟正奏曰蜀未下者數城耳不足攻宜順流東下直攻餘杭本根旣拔此將焉往願以本兵由嘉陵下夔峽與伯顏會錢塘帝優詔答曰四川事重舍卿誰託異日蜀平功豈伯顏下邪十四年皇子安西王北伐而藩王圖魯叛於六盤王相府命別速帶領兵進討惟正副之別速帶不習兵師行無紀惟正爲正部曲肅行陳嚴斥埃凡軍政一倚重焉至六盤圖魯先據西山惟正分安西兵爲左右翼鞏兵獨居中去圖魯一里許皆下馬手弓圖魯遣百騎突陳惟正率親兵八十當之令引滿毋發將及矢下如

雨傷其突騎之半盡走還惟正麾兵逐之圖魯軍遂披靡
三踰山至蕭河遂進禽圖魯安西王大燕賞以金尊貂裘
王妃以手製珠絡帽衣賜其母詔惟正入朝世祖推玉食
食之賜白金五千兩錦衣一襲授開成路宣慰使十七年
遷秦蜀行中書省左丞二十二年卒年四十有四諡貞肅

阿巴赤

阿巴赤

舊作八赤一作八失

來氏寧夏人父朮速忽里歸太祖命掌

膳事憲宗大舉伐宋攻釣魚山命諸將議進取朮速忽里
曰川蜀之地三分我有其二所未附者巴江以下數十州
耳地削勢弱兵糧皆仰給東南故死守以抗我師蜀地巖
險重慶合州又其藩屏皆新築之城依險爲固今頓兵堅
城之下未見其利曷若城二城之間選銳卒五萬命宿將

守之與成都舊兵相掎角以牽制其援師然後我師乘新
集之銳用降人爲鄉導水陸東下破忠涪萬夔諸小郡平
其城俘其民俟冬水涸瞿唐三峽不日可下出荆楚與鄂
州渡江諸軍合勢如此則東南之事一舉可定其上流重
慶合州孤危無援不攻自下矣諸將謂攻城則功在頃刻
反以其言爲迂卒不用於是博選宿衛中材力可任用者
以阿巴赤奉命往監元帥紐璘軍遏宋人援兵駐重慶下
流之銅羅峽夾江據厓爲壘宋都統甘順自夔州泝流西
上乘舟來攻阿巴赤預積薪於二壘明火鼓譟矢石如雨
順流而進宋人力戰不能支退保西岸斂兵自固黎明復
至阿巴赤身率精兵緣厓而下戰艦復進宋人敗走殺傷
數千人帝聞而壯之憲宗崩阿巴赤從父倍道歸燕世祖

卽位問以川蜀之事阿巴赤歷陳始末誦其父前所言以對世祖撫掌曰當時若從此策東南其足平乎朕在鄂渚日望上流之聲勢耳至元七年南征襄樊發河南北器械糧儲悉聚淮西之義陽慮宋人剽掠命阿巴赤督運二日而畢十八年授益都等路宣慰使都元帥發兵萬人開濟州運河河成遷膠萊海道漕運使旋以淺澀不能行舟而罷二十二年授征東宣慰使都元帥皇子鎮南王征交趾授湖廣行中書省右丞召見世祖親解衣衣之二十四年改湖廣行尙書省右丞詔四省所發士馬俾阿巴赤閱視九月領中衛親軍千人翊導皇子至思明州交趾阻險拒守選精銳與戰女兒關斬馘萬計餘兵棄關走大軍深入進至交州陳日烜空城而遁遣使約降欲以賂緩我師阿

巴赤曰日烜棄巢穴而匿山海意待吾之敝而乘之耳春夏之交瘴癘作日烜弗就禽北兵何能持久今出兵分定其地招降納附勿縱士卒侵掠急捕日烜不可失也時諸將皆信日烜約降之說且修城居以待其至久之軍乏食日烜不至擁眾據竹洞安邦海口阿巴赤率兵往攻屢遇交兵晝夜迎戰交兵敗遁會將士多疫不能進而諸蠻復叛所得關隄皆失守乃議班師選諸軍步騎命先啟行且戰且行日數十合交兵據高險射毒矢將士裹瘡以戰諸軍護皇子出交趾阿巴赤中毒矢三首項股皆腫遂卒子寄僧爲水達達屯田總管府達魯花赤乃顏叛戰於高麗雙城調萬安軍達魯花赤平黎蠻有功遷雷州路總管卒孫完者不花同知潮州路總管府事

李德輝

呂堊

李德輝字仲實通州潞縣人生五歲父疾革指德輝謂家人曰吾爲吏治獄不任苛刻蒙德者衆天或報之是兒其大吾門乎既就外傳嗜學貧無以自資輒輟業年十六監酒豐州祿食足供母餘則市筆札錄書夜誦不休歎曰志士顧安此邪仕不足以匡君福民隱不足以悅親善身人壽幾何惡可無聞與草木同腐乃更求明師講習世祖在潛邸用劉秉忠薦使侍皇子講讀世祖受京兆分地擇廷臣能理財賦者俾調軍食立從宣府以德輝爲副使時汪德臣屯重兵數萬於利州扼四川襟喉規進取每苦乏食德輝乃募民入粟縣谷散錢幣給鹽券爲直陸輓興元水漕嘉陵未期年而軍儲充羨至元初由太原路總管入爲

右三部尙書皇子安西王鎮關中奏以德輝爲輔改安西王相至則視瀕涇營牧故地可得數千頃起廬舍疏溝澮假牛種田具與貧民屯田其中歲得粟麥芻藥萬計奉命以王相撫蜀時宋亡惟川蜀久不下宋制置使張玘守重慶安撫使王立守合州於是分建東西二川行樞密院令合丹闕里吉思領東院攻合州丞相不花與德輝領西院攻重慶德輝至成都各遣使請方略德輝曰宋已亡矣重慶以彈丸地不降何歸正以公輩利剽掠民不得有其子女懼而不來耳曷者中使奉璽書來赦公等不能推心置腹反示以詐使彼叛去堅其必死之心中使不喻詐計竟以不奉明詔復命非養寇而何況軍政不一行且敗矣未幾瀘州叛重慶圍亦潰詔以德輝行西院副使事復瀘州

再圍重慶尋拔之紹慶南平夔施思播諸山壁水柵皆下而東川樞府猶故將也惡相屬願獨軍圍合州初張玘守合州德輝以書遺玘曰天子威德遠播宋室既亡三宮皆北苟能早自歸誠必取將相與夏呂比且汝之爲臣不親於宋之子孫合之爲州不大於宋之天下彼之子孫尙舉天下歸朝汝猶偃然負阻窮山而曰吾忠於所事不亦惑哉玘不報既而合州遣李興張郃等偵事成都德輝獲之釋不殺至是復爲書縱歸使諭其將王立如諭玘者未幾立使興等懷蠟書閒至成都言李公能自來卽降德輝卽從兵數百人馳赴東川先是重慶破玘走涪州自經死至是東院諸將皆曰公昔爲書招玘詞亦偉矣而竟無功今立乃玘身校也習狙詐不信是特以計致公延命晷刻耳

德輝曰重慶已下合州孤立窮而來歸亦勢所必然吾豈肯讓諸君垂成之功誠懼諸君憤其抗命快心屠城吾欲爲國活此州民耳卽單舸濟江薄城下呼立出降承制授立權安撫事知合州川蜀盡平旣而東川行院恥無功言立久抗王師且嘗指斥憲宗奏請誅立械繫長安獄將殺之會行院都事呂塋以事至上都白畱守賀仁傑爲言於帝而安西王亦具立降附本末來上且言東川院臣憤德輝受降之故誣奏誅立帝召樞密臣責之仍命立爲合州安撫使以德輝爲安西行中書省左丞會西南夷羅施鬼國旣降復叛詔滇楚四川各出兵合討將壓境德輝適被命在播馳驛止三道兵勿進而遣使諭鬼國趣降其長阿察素熟德輝名曰是活合州李公邪卽身至播州泣告曰

吾屬微公來死且不降今願以百萬人民託公事聞詔許其降改鬼國爲順元路或譜德輝受鬼國馬千數帝曰是人朕所久知雖一羊不妄取也卒年六十三蠻夷聞訃哭之如私親王立自合州衰經率吏民拜哭護喪歸興元至今播州廟祀不絕

呂塋字伯充河內人七世祖公緒與宋丞相公著爲從昆弟祖父避亂隸兵籍轉徙北郡復至關中家焉塋從許衡學於京兆衡爲國子祭酒舉塋伴讀輔成教養有功至元十三年言者稱襄漢新附民情未安塋言其從父呂子開者向爲襄陽制置司參謀官今退居鄂其人悉知宋事宜徵用之遂奉使往以子開入覲陳安撫襄漢便宜詔以子開爲翰林直學士辭不就十四年授塋四川行樞密院都

事時宋制置使張玘守重慶安撫使王立守合州詔樞府分兵取之李德輝行西院事於成都獲立偵卒張邵等數人將殺之塋曰彼不卽降者以昔嘗抗命降懼誅耳今宜釋邵等俾歸諭立未幾立果遣邵等齎蠟書至成都德輝請與東院同受降後期不至德輝承制授立仍爲安撫使知合州開倉振民禁戢剽掠而瀘敘崇慶思播夔萬等郡聞之相繼送款巴黔民感塋與德輝之惠竝祠事之東院恥其無功誣德輝越境邀功械立於長安獄將誅之塋適以事至京師言於許衡衡白畱守賀仁傑遂奏釋立賜金虎符仍舊官塋亦以功授四川行省左右司郎中二十年徵爲國子司業以未終喪辭三十年改華州知州勸農興學具有成效及代民爭畱之大德中河東關隴地震月餘

不止盛與集賢學士蕭剡各設問答數千言以究其理且移書廟堂陳救災弭患之道仁宗卽位召拜翰林侍讀學士卒封東平郡公諡文穆

李庭玉

楊大淵

楊文安

李庭玉一名忽蘭吉隴西人父節仕金歲乙未自鞏昌石門山從汪世顯以城降庭玉隸皇子闕端爲質子從征西川辛丑以功爲管軍總領兼總帥府知事從征西番南澗有功癸丑世祖在潛邸命爲管軍千戶都總領佐汪德臣立利州乙卯正月將兵三萬取合江大獲山宋劉都統率眾謀焚利州沙市次青山庭玉以伏兵取之俘獲甚眾丙辰憲宗更賜金符仍命爲千戶都總領戊午庭玉以兵先趨劍門覘伺奪宋運糧兵於長寧俘其將校憲宗南征掌

橋道饋餉有功從攻苦竹隘山寨先登斬守將楊立獲都
統張寶招降長寧青居大獲山運山龍州等寨十一月大
獲山守臣楊大淵既降復逃去憲宗怒將屠其城庭玉亟
追之迺單騎至城下門未閉大呼入城曰皇帝使我來撫
汝軍民一卒引入甲士環立庭玉下馬執大淵手謂之曰
上方宣諭賜賞不待而來何也大淵曰誠不知國朝禮體
且久出恐城寨有他變是以亟歸非敢有異謀也遂與偕
來一軍皆喜庭玉入奏曰楊大淵果不反憲宗曰汝何以
知之對曰軍馬整肅防內亂也城門不閉無他心也一聞
臣言卽撫綏軍民從臣以出何反之有大淵遂以故官侍
郎都元帥聽命而一城得生全憲宗命庭玉與怯里馬哥
領戰船二百艘掠釣魚山奪其糧船四百又作浮梁以通

往來已未與怯里馬哥等領蒙古漢軍略重慶六月總帥汪德臣歿於軍命庭玉以其軍殿後宋兵水陸晝夜接戰皆敗之部軍皆青居人賞賚獨厚遂與蒲察都元帥守青居治城壁儲芻糧招納降附宗王穆哥承制命庭玉佩金符爲鞏昌元帥中統元年德臣子惟正襲總帥至青居五月渾都海叛據六盤山詔庭玉從汪良臣發所統二十四州兵追襲之力戰斬渾都海等於陣以功授鞏昌後路元帥賜金幣鞍馬弓矢火都叛於西番點西嶺汪惟正帥師襲之至怯里馬之地火都以五百人遁入西番庭玉與荅刺海兵三千人追襲禽之四年詔賜虎符庭玉不受曰臣聞國制將萬軍者佩虎符若汪氏將萬軍已佩之臣何可復佩帝是其言命於總帥汪惟正下充鞏昌路元帥所屬

官悉聽節制至元元年入覲命與同僉總帥汪良臣還蜀
守青居是時元兵猶與宋兵相持釣魚山三年宋兵陷大
良平山寨平章賽典赤令庭玉領兵千餘騎掠其境有功
四年以本職充閬蓬廣安順慶夔府等處都元帥參議六
年賜虎符授夔東路招討使以軍三千立章廣平山寨置
屯田出兵以絕大良平餉援之道十年正月成都失利帝
遣人問成都所以失所以救失庭玉附奏曰初立成都惟
建子城軍民止於外城別無城壁宋軍乘虛來攻失於不
備軍官皆年少不經事之人以此失利西川地曠人稀宜
修置城寨以備不虞今蒙古漢軍多非正身半以驅奴代
宜嚴禁之所謂修築城寨練習軍馬措畫屯田規運糧餉
剗造舟楫完繕軍器六者不可缺一尤當任賢遠讒信賞

必罰修內治外選用良將隨機應變爲制控邊陲之本六月將兵赴成都與察不花同權省事十一月復還守章廣平山寨前後每戰輒勝十三年引兵略重慶復取簡州十四年承制授延安路管軍招討使十五年圖魯叛於六盤山庭玉以延安路軍會總帥府兵於六盤敗圖魯於武川俘其孥還十月入覲賜金虎符授四川北道宣慰使庭玉請以先所受鞏昌元帥之職及虎符與其弟庭望二十年改四川南道宣慰使二十二年詔會四川行省兵分道進討五溪洞蠻之劫掠邊民者一軍出黔中一軍出思播一軍出澧州而庭玉一軍自夔門會合十一月諸將鑿山開道絲互千里諸蠻伏險隘木弩竹矢伺閒竊發亡命迎敵者皆殲之遣諭諸蠻酋長皆率眾來降二十三年入覲乞

病歸田里帝憫之得還鞏昌二十六年行省列奏其功請用范殿帥故事商議本省軍事二十七年遙授陝西等處行尚書省左丞商議軍事食左丞之祿元貞二年入覲授陝西行中書省右丞卒諡襄敏

楊大淵天水人與兄大全弟大楫皆仕宋歲戊午憲宗伐宋入蜀大淵總兵守閬州之大獲城斬元招降之使憲宗怒督諸軍力攻始降其城欲誅之以汪田哥諫而止命以其兵從招諭蓬州廣安擢行軍總管從諸王攻禮義城己未冬拜侍郎都行省世祖中統三年春命出開達與宋兵戰於平田復戰於巴渠禽其知軍范變統制魏興等先是大淵建言謂取吳必先取蜀取蜀必先取夔取夔必先據蟠龍山四面巖阻可以進攻退守此夔達要衝必爭之

地宜先城之乃使其兄子文安往築城未畢宋夔路提刑鄭子發率兵來爭文安悉力備禦大淵復遣文安之兄文仲將兵往援宋兵宵遁追敗之秋七月詔賜其麾下將士金符十銀符十九別給海青符二俾事亟則馳以聞大淵請於利州大安軍以鹽易軍糧從之冬拜東川都元帥俾與征南都元帥欽察同署事大淵還復於渠江濱築虎嘯城以逼宋大良城不踰時而就四年宋賈似道遣楊琳齎空名告身及蠟書金幣誘大淵南歸文安禽之以聞詔誅琳五月世祖詔獎諭大淵及張大悅復神山功既而大淵擅殺其部將王仲詔戒敕之令免籍仲家至元元年冬十月大淵謀知宋總統祁昌由閒道運糧入得漢城乃自率軍襲之於椒坪連戰三日禽祁昌向良等俘獲輜重以數

千計明日宋都統張思廣引兵來援復大破之二年卒追封闔中郡公諡肅翼子文粲襲都元帥兄子文安

文安字秦叔父大全仕宋守敘州戰死諡愍忠官其長子文仲文安方幼依叔父大淵及大淵以闔州降文仲亦授安撫使中統元年授文安監軍屢攻禮義城戰通川戰開達皆有功授招討使軍於巴渠萬安寨主盧埴降遂築蟠龍城以據夔達要路屢敗宋兵四年進築虎嘯城以困大良至元元年復築方斗城爲蟠龍聲援令裨將高先守之敗宋兵於潼川射洪又邀其運糧軍於得漢城外連戰三日降其城獻俘闕下二年宋兵由開州運糧餉達州文安屢率奇兵閒道邀奪之三年總帥汪惟正遣其將李水波等由閒道襲開州文安遣千戶王福引兵助之福先登破

其城宋諸路兵來救圍城三匝築壘城外四年春行省命文安往援卽率兵斷其糧道飛矢中面拔矢力戰大破之而文安以創甚還蟠龍宋兵遂復開州五年文仲卒詔文安就佩金虎符充閬州夔東路安撫使軍民元帥閬州屢遭兵變戶口凋耗文安乃教以耕桑卹其鰥寡民始復業自後連年與宋兵戰開達閒大小數十戰八年授東川路征南招討使九年秋領軍出小寧措置屯田築金湯城以積屯田之糧且以逼宋龍爪城慮宋兵必來爭遣韓福出兵通川以牽制之屢敗其輸糧開達之兵覆其糧艘十年閏六月蓬州兵攻拔龍爪城會蓬州兵已去宋都統趙章復來據之且出兵迎敵文安與戰破之十一年秋與蒙古漢軍萬戶怯必烈等攻宋夔東拔高陽夔巫等寨因跨江

爲橋以斷宋兵往來之路宋兵來爭戰卻之時宋以鮮汝忠趙章易鎮開達二州而汝忠家屬尙畱開文安曰達未易攻若先拔開州俘其家屬以招汝忠則達可不煩兵而下乃遣蔡邦光等往攻開州而盛兵據蟠龍爲聲援十二年正月諸軍夜銜枚薄開州城下遣死士先登斬關入及城中人知已立幟於城之絕頂矣宋軍潰散禽趙章而守將韓明父子猶率所部兵巷戰力屈亦就禽文安遷汝忠家屬於蟠龍遣元帥王師能持檄往達州招之曰降則家屬得全不降則闔城塗炭宜早爲計汝忠遂率所部將士詣軍門降趙章子桂楫守師姑城遣兵招之亦降獨洋州龍爪城守將謝益固守併力攻之亦棄城走於是遣將挾鮮汝忠往招由山等處八城皆望風迎降凱還獻捷京師

帝悅加授文安驃騎衛上將軍兼宣撫使又招都勝茂竹
廣福三城皆降之秋七月兵至樂勝城守將蒲濟川降進
攻梁山宋將袁世安堅守文安焚其外城梁山軍恃忠勝
軍爲固力攻拔之圍梁山四十日世安隨方備禦竟不降
文安乃移兵攻萬州之牛頭城殺守將進圍萬州守將上
官夔戰守甚力文安乃遣軍出小江口敗其援兵而萬州
固守不下乃解圍去攻石城堡攻雞冠城又招石馬鐵平
小城三聖油木牟家下隘等城皆下冬進攻白帝城夔帥
張起巖亦堅守不出文安以師老乃還宋都統弋德復據
開州文安乃築城神山以逼之令元帥蔡邦光等屯守
十三年朝廷遣安西王相李德輝經畫東川宋將袁世安
遣使來約降秋七月進攻萬州上官夔固守圍之踰月攻

拔外城夔守張起巖來救擊破之盡殪其舟師萬州奪氣
文安盡銳攻城潛遣勇士梯城宵登斬關而入夔力戰死
萬州既定分兵略施州禽統制薛忠會大雪夜奪其城十
四年夏進兵攻咸淳府其鎮撫使馬莖與文安同里閤諭
之不降乃列柵攻城夜遣勇士躡雲梯潛入啟關納外兵
巷戰比曉宋兵大敗莖就禽十五年進攻紹慶守將鮮龍
迎敵二月復遣勇士夜以梯衝攻破其北門遂禽斬之蜀
境已定獨夔猶堅守不下朝廷命荆湖都元帥達海由巫
峽進兵取夔州而西川劉僉院挾夔守將親屬往招之文
安遣元帥王師能將舟師與俱張起巖亦以城降夏入覲
以所得城邑繪圖以獻帝勞之曰汝攻城略地之功若是
多乎擢四川南道宣慰使解白貂裘賜之十七年遣辯士

王介諭降散毛諸洞蠻遙授文安參政行四川南道宣慰使十九年春入覲擢中書左丞行江西省事到官踰月卒子良之襲佩虎符管軍萬戶歷湖南宣慰副使岳州路總管

紐璘

子耶速荅
郝和上

劉元振

劉元福

趙阿潘

紐璘珊竹帶人祖孛羅台爲太祖宿衛從太宗平金成河南父太荅爾佐憲宗征阿速欽察等國有功拜都元帥率陝西西海鞏昌諸軍攻宋入蜀卒於重慶紐璘長身有力善謀略常從父軍中丁巳歲憲宗命將兵萬人略地自利州下白水過大獲山出梁山軍直抵夔門戊午還釣魚山引軍欲會都元帥阿荅胡等於成都宋制置使蒲擇之遣安撫劉整等據遂寧江箭灘渡以斷東路紐璘軍至不能

渡自旦至暮大戰斬首二千七百餘級長驅至成都既而蒲擇之命楊大淵等守劍門及靈泉山自將四川兵取成都會都元帥阿荅胡死諸王阿卜干與諸將謀曰今宋兵日逼聞元帥死必悉眾來攻我軍去行在遠待上命建大帥然後禦敵恐無及不若推紐璘以號令諸將出彼不意敵可必破眾然之遂推紐璘爲長率諸將大破宋軍於靈泉山蒲擇之兵潰進圍雲頂山城扼宋軍歸路其主將倉卒失計遂以部眾降城中食盡亦殺其守將以降成都彭漢懷緜等州悉平威茂諸蕃亦來附詔卽軍中眞拜都元帥時紐璘軍止二萬以五千命拜延守成都自將萬五千人從馬湖趨重慶冬帝進軍至大獲山紐璘率步騎號五萬戰船二百艘發成都遣張威以五百人爲前鋒水陸竝

進謀鎖重慶江以絕吳蜀之路縛橋資州口以濟師千戶
暗都刺率舟師而下紐璘將步騎而南旌旗輜重百里不
絕鼓譟渡瀘放舟而東遇宋截道兵輒敗之造浮橋於涪
駐軍橋南北以杜宋援兵聞大軍多瘧癘遣人進牛犬豕
各萬頭明年春朝行在所還討思播二州宋將呂文煥攻
涪浮橋時新立成都士馬不耐水土多病死紐璘奉密旨
督戰不得已出師大敗文煥軍獲其將二人斬之遂班師
卻其追兵中統元年招降黎雅礪門巖州偏林關諸蠻得
漢番二萬餘戶未幾詔速哥分西川兵及陝西諸軍屬紐
璘鎮秦鞏唐兀之地三年宋將劉整以瀘州降呂文煥圍
之詔以兵往援敗文煥徙瀘民於成都潼川四年爲劉整
所譖徵至上都驗問無狀詔釋之還至昌平卒子耶速答

勇智類其父至元中世祖以屬行樞密院火都赤使習兵事從圍嘉定以三千人至三龜九頂山相地形勢敗宋安撫魯萬壽兵斬首五百級萬壽尋以嘉定三龜九頂紫雲諸城皆降又從行樞密副使忽敦率兵徇下流諸城皆望風來附忽敦以兵二萬會東川行樞密院合荅圍重慶歲餘不下帝命行樞密副使不花代將不花將兵萬餘至城下耶速荅率二十餘騎攻其門宋都統趙安出戰耶速荅三人其軍再挾猛士以出大兵四集斬首五百餘級趙安開門降制置使張珏遁追至涪州禽之捷聞授西川蒙古軍馬六翼新附軍招討使遷四川西道宣慰使都元帥羅氏鬼國亦奚不薛叛詔以四川兵會雲南江南兵討之至會靈關亦奚不薛遣先鋒阿麻阿豆等將數萬眾迎敵耶

速答馳入其軍挾出斬之亦奚不薛懼率所部五萬餘戶降以功拜西川行省右丞西南夷雄左都掌蠻得蘭右叛討降之改四川行樞密副使烏蒙蠻陰連都掌蠻以叛詔以兵會雲南行院拜答力進討禽烏蒙蠻酋遷蒙古軍都萬戶鎮唐兀之地進同知四川行樞密院事仍居鎮成宗卽位拜四川行省平章武宗時遷雲南左丞相仍平章政事南征叛蠻感瘴卒弟八刺次子拜延長子南加台相繼官四川行省左丞平章政事紐璘裨將有拜延者蒙古札刺台氏幼事太祖賜巴都魯號憲宗時佐汪德臣立利州城領兵紫金山破宋軍鹿角寨復從紐璘城成都圍降雲頂山城紐璘進兵馬湖江畱拜延鎮成都降屬縣諸城又領兵迎征大理還師敗宋兵於軍行所過之新津寨紐璘

上其功授蒙古奧魯官

舊史專傳今附

劉元振字仲舉劉伯林之孫劉疑長子也隨父入蜀立成都會疑有事往商鄧以元振攝成都萬戶時年方二十號令嚴明宿將敬服憲宗伐宋駐蹕釣魚山與紐璘爲先鋒世祖中統元年宋瀘州守將劉整密送降款疑遣元振往受之諸將皆疑其無故而降不可信元振謂宋權臣當國賞罰無章是以將士離心且整本非南人而居瀘南重地事勢與李全何異整此舉無可疑者遂行疑戒之曰劉整宋之名將瀘乃蜀之衝要今整遂以州降情僞不可知汝無爲一身慮事成則爲國家之利不成則效死乃其分也元振至瀘整開門出迎元振棄眾而先下馬與整相見明日釋戎服從數騎與整聯轡入城飲燕至醉整心服焉獻

金六千兩男女五百人元振以金分賜將士而歸還其男女宋軍帥俞興率兵圍瀘州晝夜急攻自正月至五月城幾陷左右勸元振遁還元振曰瀘之得失關國家利害且人已降我豈可以急而棄之食將盡殺所乘馬犒將士募善游者齎蠟書告急成都又權造金銀牌分賞有功未幾成都援兵至元振與整出城合擊興兵大敗走之疑卒元振授成都軍民經略使至元七年時議以勳舊家事權大重宐稍裁抑遂降爲成都副萬戶十一年命兼潼川路副招討使十二年卒

劉元禮疑第五子也性渾厚有謀略常從父軍中至元元年遷潼川路漢軍都元帥二年九月宋制置使夏貴率軍五萬犯潼川元禮所領纔數千諸將登城望敵軍有懼色

元禮曰料敵制勝在智不在力乃出戰屢破之復大戰蓬溪自寅至未勝負未決激厲將士曰此去城百里爲敵所乘則城不可得入潼川非國家有吾屬爲虜矣丈夫當死中求生卽持長刀大呼突入陳所向披靡將士咸奮無不一以當百大敗貴兵斬首萬餘級生禽千餘人立蓬溪寨又奏嘉定去成都三百六十里其閒舊有眉州城可修以屯兵扼嘉定往來之路世祖從之四年興役七日而畢宋人駭其速元禮鎮守眉州五年召入朝乞解官養母從之九年起授懷遠大將軍延安路總管卒

趙阿潘

舊作趙阿哥潘

土播思烏思藏人始祖附宋賜姓趙世居

臨洮祖巴命富甲諸羌父阿哥昌貌甚偉有力兼人仕金官熙河節度金亡以其眾來歸授疊州安撫使招逃亡立

城壘課耕桑遺民獲安輯卒於官阿潘事親以孝聞從伐蜀以破大安功取授同知臨洮府事斬朝天關乘嘉陵江至閬州獲蜀船三百艘攻利州敗宋師於潼川破宋制置使劉雄飛於青居山進逼成都略嘉定平峨眉太平寨大小五十餘戰皆先陷陳皇子闕端賜以金甲銀器歲壬子世祖以皇弟南征大理道出臨洮見而奇之命攝元帥城復利州以圖蜀時宋兵屯兩川堡柵相望矢石交擊歷五年而城始完憲宗出蜀以阿潘爲選鋒攻西安下之授臨洮府元帥帝駐釣魚山合州守將王堅夜來斫營阿潘率壯士逆戰手殺數十百人堅引去賜拔都號中統建元詔還鎮臨洮歲饑發廩給種粟二千餘石郡當孔道傳置旁午有司做於供給阿潘以私馬百匹充驛騎羊千口代民

翰帝聞而嘉之詔京兆行省酬其直卒不受以軍事赴青居山道爲宋兵所邀遂死於敵阿潘好畜良馬常千蹏歲擇其上驥五駟貢於朝子孫遵之不替諡曰桓勇士重喜從世祖征哈刺章數有功中統元年渾都海反從總帥汪良臣引兵至拔沙河納火石地逆戰以功授征行元帥四年從討忽都達吉散竹台等克之襲父職爲元帥入覲賜金虎符爲臨洮府達魯花赤時解軍職而轉民官者例納所佩符有旨趙氏世世勤勞其金符仍使終佩之重喜在郡勸農興學省刑敦教以善治聞請致仕不許擢鞏昌二十四處宣慰使卒諡桓襄長子官卓斯結性靜退辭官閑處二十餘年仁宗聞其名召不起子德壽雲南左丞

郝和上

舊連拔都號上原作尚

安肅州人以小字行幼爲蒙古兵所

掠長通譯語善騎射太祖遣使宋往返數四以辨稱詔以爲九原府主帥佩金符及太宗之世從大軍南伐略地潼陝有功授行軍千戶又從皇子曲出南伐至襄陽宋兵四十萬逆戰漢水上領先鋒數百人直前衝其陳宋兵大潰復從征蜀下興元宋將王連以重兵守劍閣乃募敢死士十二人乘夜破關入蜀諸城悉下進取夔府抵大江宋兵三十萬軍於南岸郝和上選驍勇九人乘輕舸先登橫馳陳中旣出復入宋兵辟易歲庚子覲於行在命解衣數其瘡痕二十一進拜宣德西京太原平陽延安五路萬戶易佩金虎符以兵二萬屬之甲辰朝定宗於宿貧都之行宮賜銀萬錠奏請以賜將校十餘人兼賜金銀符戊申奉詔還治太原請悉蠲遠道租稅監課過重者歲餼出白金六

十錠粟千石羊數千以助國用己酉升萬戶府爲河東北
路行省得以便宐從事凡四年壬子卒追贈冀國公諡忠
定子十二人天益仲威天佑天澤天麟天挺皆至大官天
挺別見中葉文臣傳

速哥

李進 石抹按只

速哥蒙古人父忽魯忽國王木華黎麾下卒也後更隸塔
海帖哥軍以善馳馬有口辨慎重不泄令佩銀符常居軍
中奏白機務往返未嘗失期太宗以爲才賜名動哥居詔
動哥居奏事朝至朝入奏夕至夕入奏嘗出金盤龍袍及
宮女賜之憲宗時以疾卒速哥亦以壯勇居軍中歲甲寅
憲宗命從都元帥帖哥火魯赤等入蜀乙卯萬戶劉七哥
等與宋兵戰巴州失利陷敵中速哥馳入其軍奪之以歸

後又從都元帥紐璘敗宋將劉整破雲頂山城紐璘受詔會涪州至馬湖江速哥以革爲舟夜渡江至大獲山行在所自陳道梗失期帝慰遣之未幾復自涪州入奏事遇宋軍於三曹山速哥眾僅百餘奮兵疾戰敗之奪其器械旗鼓以歸己未宋兵攻涪州浮橋部將火尼赤戰陷速哥破圍出之又以白事諸王穆哥所復敗宋兵於三曹山還至石羊與劉整遇復擊敗之中統二年賜銀符命隸紐璘軍至元二年四川行省遣招收降民得三千餘人三年從行院帖赤戰九頂山四年行省耶速台署爲本軍總管從征瀘州五年立德州以速哥爲達魯花赤擢陝西五路四川行省左右司員外郎從耶速台入朝賞賚加厚七年從耶速台敗宋軍於馬湖江用平章政事賽典赤薦遷行尙書

省員外郎九年建都蠻叛詔諸王奧魯赤及耶速台討之
速哥將千人爲先鋒破黎州水尾砦攻連雲關克之軍至
建都戰於東山斬其酋布庫復與元帥巴爾圖迎合刺軍
於不魯思河所過城邑皆下十年討碉樓諸蠻襲破連環
城還敗宋軍於七盤山辟新軍萬戶十一年賜虎符眞授
管軍萬戶領成都高哇哥等六翼及京兆新軍教習水戰
耶速台進圍嘉定速哥率舟師會平康城修築懷遠等砦
守其要害十二年遣兵敗宋將咎萬壽於麻平旣而行樞
密副使忽敦等軍至與耶速台會於紅崖遣速哥守龍垣
城中大震宋將陳都統鮮于團練率舟師遁速哥追擊之
溺死者不可勝計遂與中使沈荅罕徇下流諸城紫雲瀘
敘皆降進圍重慶速哥以所部兵鎮白水馬湖江口十三

年帝遣脫朮教化的持詔諭其守臣使降不聽乃分兵爲五道水陸竝進攻之眾軍不利唯速哥獲戰艦三百艘俘其眾百三十人涪州守將遣書納降速哥率千人往察其情僞至果降遂入其城重慶守臣張萬率眾來襲速哥一日夜出兵凡與十八戰斬首二百餘級萬敗走未幾萬復以精兵三千人來攻又戰敗之十四年行院辟爲鎮守萬戶嘉定總管府達魯花赤時瀘州復叛速哥從大軍討平之重慶受圍久其守將趙安開門出降制置使張珪遁速哥追破之虜百餘人及其舟二十餘艘以功授成都水軍萬戶尋改重慶夔府等路宣撫招討兩司軍民達魯花赤十六年除四川南道宣慰使依前成都水軍萬戶鎮重慶夔施黔忠萬雲涪瀘等州十九年亦奚不薛蠻叛置順元

等路軍民宣慰司以速哥爲宣慰使經理諸蠻二十四年
遷河東陝西等路萬戶府達魯花赤播州宣撫賽因不花
等赴闕請留之降八番金竹等百餘峒得戶三萬四千悉
以其地爲郡縣置順元路金竹府貴州以統之東連九溪
十八洞南至交趾西至雲南咸受節制二十九年入朝加
都元帥改河東陝西等處萬戶府達魯花赤三十一年僉
書四川行樞密院事詔開吐蕃道吐蕃叛以兵圍茂州速
哥率師敗之元貞元年行院罷速哥家居數歲卒子壽不
赤襲河東陝西等處萬戶府達魯花赤

李進保定曲陽人幼隸軍籍初從萬戶張柔屯杞之三义
口時荆山之西九十里曰龍岡者宋境也歲庚戌春張柔
引兵築堡岡上會淮水汎漲宋以舟師卒至主帥察罕益

德率兵逆戰進以兵十五人載一舟轉鬪十餘里奪一巨艦遂以功授百戶戊午憲宗西征丞相史天澤爲河南經略大使選諸道銳兵從命進爲總把是年秋九月道由陳倉入興元度米倉關其地荒塞不通進伐木開道七百餘里冬十一月至定遠七十關其關上下皆築連堡宋兵五百守之巴渠江水環堡東流天澤命進往關下說降不從進潛視閒道歸白天澤曰彼可取也是夜二鼓天澤遣進率勇士七十人掩其不備攻之脫門樞而入者二十人守門者覺拔刀拒之懸門俄閉諸軍不得入進與二十人力戰殺傷三十人宋兵走上堡進乃毀懸門納諸軍追至上堡殺傷甚眾宋守兵不能敵棄堡走諸軍盡度關己未春二月天澤兵至行在所圍合州釣魚山寨夏五月宋由嘉

陵江以舟師來援宋戰船三百餘泊黑石峽東以輕舟五十爲前鋒北軍船七十餘泊峽西相距里許帝立馬東山擁兵二萬夾江而陳天澤手旗鼓麾諸軍東進宋前鋒潰走戰艦繼亂順流縱擊死者不可勝計帝指顧謂諸將曰白旗下服紅半臂突而前者誰也天澤以進對賞錦衣名馬八月攻重慶浮圖關前後凡五戰皆受上賞世祖卽位入爲侍衛親軍從征李壇有功至元八年領兵赴襄陽十二年從略地湖北湖南宋平以兵馬使屯鄂州十三年領軍三千屯田河西中興府十五年移屯六盤山十九年賜虎符屯田西域別什巴里二十三年秋叛王海都及篤哇等軍至洪水山進與力戰眾寡不敵軍潰被禽從至操八里遁還及和州收潰兵三百餘人且戰且行還至京師二

十五年授蒙古侍衛親軍都指揮使司僉事明年改授左翼屯田萬戶元貞元年卒子旻襲

石抹按只契丹人世居太原父大甲閭率漢軍五百人歸太祖歲戊午按只代領其軍從都元帥紐璘攻成都殺宋守將韓都統又從都元帥按敦攻瀘州以戰艦七十至馬湖江敗宋水軍五百艘時宋兵沿江徹橋據守按只相地形造浮橋宋兵來攻撓者輒擊敗之遂自馬湖以達合江涪江清江凡立浮橋二十餘所師無畱行及四川平浮橋功居多宋以巨艦載甲士數萬屯清河浮橋相距七十日水漲橋壞西岸軍多漂溺按只軍東岸急徹浮橋聚舟岸下士卒得不死又援出別部軍五百餘人憲宗遣使慰賜甚厚敘州守將橫截江津軍不得渡按只作牛皮渾脫及

皮船乘之與戰奪其渡口爲浮橋濟師中統三年授河中府船橋水手軍總管佩金符以立浮橋功也至元四年從行省耶速台攻瀘州以水軍與宋將戰於馬湖江敗之六年耶速台領兵趨瀘州遣按只運器械糧食由水道進復敗宋兵馬湖江奪船以渡又以水軍千人運糧於眉簡二州軍中賴之九年從征建都蠻歲餘不下按只先登其城力戰遂降之軍還道病卒行省承制以其子布老代領其軍布老從攻嘉定以巨艦七十艘載勇士數千據其上流於府江紅崖灘造浮橋以渡十二年嘉定降及諸軍圍重慶布老先以戰艦三百艘列陳於觀灘絕其走路十三年乘夜襲宋軍直抵重慶城下攻千斯門宋軍驚潰獲其旗幟甲仗以獻又敗宋涪州來援之師奪其船十艘十五年

復攻重慶太平門先登殺守陣卒數十宋都統趙安以城降奪戰艦五十艘十六年命襲父職爲船橋軍馬總管更賜金虎符兼夔路守鎮副萬戶十八年降大小盤諸洞叛蠻遂以爲保寧等處萬戶

元史卷二十九

列傳十五

平宋功臣

至元渡江之役仁義之師紹美曹斌可謂盛矣惟伯顏慶
祥於沿海而阿里鯨恣於上游有遺憾焉舊史至百餘傳
今刪并存九篇而宏綱偉略已無所不舉若夫弩弓礮手
效指曠之能偏裨先登貪爪牙之賞依草附木起武材官
凶足數哉今刪其傳而附其姓名若苦徹拔都若怯怯里
若脫歡若失里伯若高諾爾一作兒若劉斌若謁只里若鄭
溫若哈刺台若沙全若帖木不花若完顏石柱若石高山
若鞏彥暉若賈文備若解誠若管如德若朱國寶若齊秉
節若隋世昌若蔡珍若張泰亨若葉仙鼐若賀祉若孟德
若鄭義若張榮寶若楚鼎若奧魯赤若周全若孔元若捏

古刺若月舉連赤若阿思蘭若哈八圖若艾貌若鄭鼎若劉通若綦公直若張均若謝仲溫皆可不傳至若重喜塔不已祖孫直脫爾忽刺出祖孫杭忽思阿荅赤父子皆一人而複傳其實皆可從刪斯又舊史重紕馳繆無足責者元之平金平宋皆以金宋降臣爲鄉導則劉整呂文煥之功不可無傳以著其勞而雷夢炎夏貴蒲壽庚方回之賣國負君亦不可無附書以著其罪今附錄於後

伯顏

孟禩

伯顏蒙古八鄰部人曾祖述律哥圖爲八鄰部左千戶祖阿刺襲父職兼斷事官平忽禪有功得食其地父曉古台從宗王旭烈開西域伯顏長於西域至元初旭烈遣入奏事世祖偉其貌辯其言曰非諸侯王臣也其留事朕遣介

還報建謀發論恆出廷臣右諸曹白事有難決者徐以一
二語決之眾咸服曰眞宰輔器敕以中書右丞相安童女
弟妻之二年七月拜中書左丞四年改中書右丞七年遷
同知樞密院事一時輔相皆賢朝野晏然號爲極治十一
年大舉伐宋與史天澤竝拜中書左丞相行省荆湖時荆
湖淮西各建行省天澤言號令不一或致敗事且以病表
請專任伯顏乃以伯顏領河南等路行中書省所屬竝聽
節制秋七月陛辭世祖諭之曰昔曹彬以不嗜殺平江南
汝其體朕心爲吾曹彬可也九月甲戌朔會師襄陽分軍
三道竝進丙戌伯顏與平章阿朮由中道循漢江趨郢州
郢新舊二城夾漢南北橫鐵絙聯戰艦水樹密椿伯顏曰
攻城下策也偵其下游有溝南通藤湖至漢僅數里乃耀

兵郢城不攻而潛襲下流黃家灣堡奪之盪舟由藤湖入漢諸將以郢城我之喉襟不取恐爲後患伯顏曰大軍之出豈爲此一城哉遂舍郢順流下伯顏阿朮以百騎殿破其追騎二千次沙洋暨新城皆使降臣持黃檄屢招之屢不應乃礮破沙洋而屠之諸軍蟻附遂拔新城守將邊居諛率眾三千力戰死十一月丙戌下復州諭諸將不得入城違者以軍法論阿朮使右丞阿里海牙來言渡江之期伯顏不答明日又來又不答阿朮乃自來伯顏曰此大事也主上以付吾二人可使餘人知乎潛刻期而去宋淮西制置使夏貴等以戰艦萬艘分據漢口要害以精兵守陽邏堡以游擊軍扼中流兵不得進有淪河口可通沙蕪入江亦有宋兵守之乃陽言圍漢陽夏貴果移兵來援潛遣

奇兵奪沙蕪口遂開埧引船由淪河趨沙蕪入大江其騎
兵十萬咸列江北諸將請攻沙蕪南岸取彼戰船伯顏曰
一舉渡江收其全功毋貪小利遂壓陽邏堡而軍再遣人
招之其將士皆曰我輩受宋厚恩死戰報國此其時也我
宋天下今日猶賭博孤注輸贏決此一擲何多言伯顏麾
諸將攻之三日不克伯顏密語阿朮曰彼謂我必拔此堡
方能渡江若潛師從上流襲渡彼必不爲備乃分遣阿里
海牙督萬戶張弘範等以步騎攻陽邏堡夏貴來援遂俾
阿朮出其不意夜渡青山磯敗宋水師都統程鵬飛於中
流揚兵南岸夏貴軍聞之解體阿里海牙復以舟師薄之
夏貴走陽邏堡伯顏聞報揮諸將急攻破之宋軍大潰數
十萬眾死傷幾盡夏貴僅以身免走至白虎山諸將請追

禽之伯顏曰陽邏之捷吾欲遣使前告宋人而貴走是代
吾使也貴將來矣伯顏登武磯山大江南北皆元軍也大
會諸將議兵所向或欲先取蘄黃伯顏用阿朮計定議先
取鄂漢爲東下後路之防遂渡江次鄂州明日鄂州漢陽
德安府皆以城降畱阿里海牙等以兵四萬守之使規取
荆湖而白與阿朮統大軍水陸東下明年春興國蘄黃江
州南康安慶池州所至望風而靡二月賈似道都督諸路
軍馬十三萬陳丁家洲步軍指揮使孫虎臣爲前鋒夏貴
以戰艦二千五百艘橫互江中似道將後軍伯顏命左右
翼騎兵夾江而進礮聲震百里宋軍陳動貴先遁似道軍
奪氣阿朮手柁衝敵船以小旗麾何瑋李庭等竝舟深入
伯顏命步騎左右倚之追殺百五十餘里溺死無算得船

二千餘艘及其軍資器仗圖籍符印似道東走揚州貴走廬州虎臣走泰州由是太平寧國建康無爲和州鎮巢饒州鎮江皆送管籥請城主江東諸郡皆下淮西滁州諸郡亦相繼降諸軍駐建康禁侵掠上遣國信使廉希賢嚴忠範使宋請兵自衛伯顏曰行人以言不以兵兵多徒爲累希賢固請與之至獨松嶺果爲宋人所殺伯顏以行中書省駐建康阿塔海董文炳以行樞密院駐鎮江阿朮別奉詔攻揚州江東饑疫伯顏命廩振而醫藥之居民大悅宋遣都統洪模移書徐王榮等言般使之事太皇太后及嗣君實不知皆邊將之罪當按誅之願輸幣請罷兵通好伯顏命議事官張羽等持答書至平江驛宋人又殺之四月有詔天暑不利行師俟秋再舉伯顏奏言百年逋寇保據

江海如獸保險今已扼其吭少縱之則逸而逝矣世祖語使者曰將在軍不從中制兵法也其召丞相來朝面議五月以阿剌罕爲參政留治省事伯顏渡江北上七月進右丞相讓功於阿朮乃并以阿朮爲左丞相八月受命出都九月會師淮安城下伯顏親臨南城堡揮諸將長驅而登拔之十月圍揚州未下畱諸將守灣頭新堡而自赴鎮江十一月分軍三道參政阿剌罕等爲右軍以步騎自建康出四安趨獨松嶺參政董文炳等爲左軍以舟師自江陰循海趨澈浦華亭伯顏以中軍出常州道水陸竝進約會于臨安時常州已降復叛固拒數月不下乃親督帳前軍礮弩晝夜環攻陷之屠其城守將劉師勇遁諸將請追之伯顏令勿追曰師勇所過城守者膽落矣旣而平江湖州

嘉興果相繼下十二月次無錫宋將作監柳岳等奉其國主及太皇太后書併宋之大臣與伯顏書來見泣訴奸臣蔽主太皇太后及幼主皆不知望哀憐罷兵伯顏曰汝國執我行人十六年所以興師問罪去歲又無故殺害廉奉使今尙何言錢王納土李主出降聽可自擇且爾宋昔得天下於小兒今亦失於小兒蓋天道也軍進次平江會囊加台同宋尙書夏士林侍郎呂師孟宗正少卿陸秀夫以書來請尊世祖爲伯父而世修子姪之禮且約歲幣銀二十五萬兩帛二十五萬匹伯顏遣還臨安十三年正月次嘉興宋宰臣陳宐中遣御史劉岳奉宋主稱臣表文副本及致書伯顏約會長安鎮又令都統洪模持書同囊加台來見及次長安鎮宐中等不至進軍臨平鎮次皋亭山宋

主遣知臨安府賈餘慶等奉傳國璽及降表詣軍前伯顏受訖進軍臨安北十五里宋臣陳宐中張世傑蘇義劉師勇等以益王廣王下浙江航海而南惟謝太后及幼主畱宮中伯顏亟遣左右軍追之不及禁軍士毋入城遣呂文煥持黃榜諭臨安中外軍民仍宋衣冠不改制先是三衙衛士白晝殺人閭里小民乘亂剽掠至是民皆安堵如故乃遣降臣程鵬飛洪雙壽等入宮慰諭謝后謝后遣丞相吳堅文天祥樞密謝堂安撫賈餘慶內官鄧惟善來見伯顏慰遣之顧天祥舉動不常疑有異志畱之軍中令館伴羈縻之遣使諭宋主削帝號易降表駐軍臨安城北建大將旗鼓率左右翼萬戶巡臨安城觀潮於浙江宋宗室大臣皆來見令宋主謝后以手詔諭未附州郡罷文天祥所

招募義兵二萬人伯顏登師子峰觀臨安形勢分諸將共

守其城二月遣人往淮西招夏貴仍遣別將徇地浙東西

於是嚴婺台處諸州竝下夏貴亦以淮西降伯顏承制以

臨安爲兩浙大都督府芒古台

古一作兀

范文虎入治府事籍

其軍民錢穀之數閱實倉庫收百官誥命符印圖籍悉罷

宋官府取宋主居之別室分遣新附官招諭南北兩廣四

川未下州郡部分諸將分屯要害仍禁侵壞宋山陵是日

移軍浙江之澆其地爲潮退淤灘北軍不知也旣而潮不

至者三日宋人大驚歎爲天助遣使奉宋降表赴闕伯顏

拜表稱賀曰國家之業大一統海岳必明主之歸帝王之

兵出萬全蠻夷敢天威之抗始干戈之爰及迄文軌之會

同區宇一清普天均慶恭惟皇帝陛下道光五葉統接千

齡梯杭日出之邦冠帶月支之域際丹崖而述職奄瀚海以爲家獨此昏愚弗遵聲教謂江湖可以保逆命舟楫可以敵王師連兵負固逾四十年背德食言難一二計當聖主飛渡江南之日遣行人乞爲城下之盟逮凱奏之言旋輒詐謀之復肆拘囚我信使忘乾坤再造之恩招納我叛臣盜漣海三城之地我是以有六載襄樊之討彼居然無一介行李之來禍旣出於自求怒致聞於斯赫臣等肅將禁旅蒸行天誅爰從襄漢之上流復出武昌之故渡藩屏一空於江表烽煙直接於錢塘尙無度德量力之心荐有殺使毀書之事屬廟謨之親稟謂根本之宜先乃命阿剌罕取道於獨松董文炳屯師於海渚臣與阿荅海忝司中閩直指僞都掎角之勢旣成水陸之師竝進常州已下列

郡傳檄而悉平臨安爲期諸將連營而畢會彼知窮蹙迭
致哀鳴始則有爲姪納幣之祈次則有奉璽稱藩之請願
甘言何益於實事率銳卒直抵於近郊召來用事之大臣
放散思歸之衛士崛強心在四郊之橫草都無飛走計窮
一片之降旛始豎其宋國主已於二月初五日望闕拜伏
歸附訖所有倉廩府庫封籍待命外臣奉揚寬大撫戢吏
民九衢之市肆不移一代之繁華如故茲惟睿算卓冠前
王視萬里如目前運天下於掌上致令臣等獲對明時躬
逢駿烈中外混一車書會同無任瞻天望聖激切屏營之
至謹奉表稱賀以聞宋福王與芮亦來降三月伯顏入臨
安俾郎中孟祺籍其禮樂祭器冊寶儀仗圖書以阿剌罕
董文炳留治行省事經略閩粵芒古台以都督鎮浙西校

都以宣撫使鎮浙東唐兀台李庭護送宋君臣北上伯顏發臨安惟謝后以疾獨留隆國夫人黃氏暨宮人從行者百餘人福王與芮沂王乃猷謝堂楊鎮而下官屬從行者數千人三學之士數百人宋主求見伯顏曰未入朝無相見之禮五月伯顏以宋主至上都世祖御大安殿受朝賀封宋主曩瀛國公宋平得府三十七州百二十八關監二縣七百三十三命伯顏告於天地宗廟大赦天下以伯顏同知樞密院賜銀鼠青鼠只孫衣二十襲裨校以下賞銀有差十四年宗王昔里吉劫皇子北平王拘安童以叛應海都命伯顏率師討之遇賊斡魯歡河夾水而陳相持久之令牧馬具食俟賊懈俄麾軍兩翼渡水掩其不備破之昔里吉走死十八年二月世祖命皇太子燕王撫軍北邊

以伯顏從仍諭之曰伯顏才兼將相忠於所事故俾汝從不可以常人遇之皇太子次舍必與論天下事尊禮有加是歲頒羣臣食邑益以藤州等處五千戶當伯顏之平宋還朝也詔百官郊勞平章阿合馬先諸官謁於道伯顏解所服玉鉤條遺之且曰宋寶玉固多吾實無所取勿薄此也阿合馬謂其輕己思中傷之乃誣以平宋時取其異寶曰玉桃蓋帝察之無驗阿合馬既死有獻此蓋者帝歎曰吾固知伯顏無欺也別吉里彌什者嘗誣伯顏以死罪未幾以他罪誅敕伯顏臨視伯顏與之酒愴然不顧而返世祖問其故對曰彼自有罪以臣臨之人將不知天誅之公也二十二年秋宗王阿只吉失律詔伯顏代總其軍遠斥埃謹堤防足兵食明賞罰不肯邀功生事將校大和敵人

遠避嘗令軍中采蔑怯葉及循敦之根貯之人四斛草粒稱是冬盛雨雪人馬賴以不饑又令有捕毳獸者積其皮至萬輦京師易縉帛以衣邊軍二十四年春遼東宗王乃顏將叛報至詔伯顏覘之多載衣裘入其境輒賜驛人既至乃顏爲設宴謀執之伯顏酒半趨出與其從者分三道逸去驛人以得衣裘故爭獻健馬遂得脫馳還白狀佐世祖親征奏敵兵多蒙古親亞戰故不力請命李庭董士選將漢軍用漢法戰乃顏黨金家奴塔不台進逼乘輿漢軍力戰果敗之卒禽乃顏二十六年進知樞密院事出鎮和林二十九年秋討叛王蔑里海都等相值於阿撒忽圖嶺大戰破之蔑里挺身走軍還遇伏兵於必石圖嶺伯顏堅壁不動黎明逐之斬首二千級縱其謀者齎書諭蔑里以

禍福寔里得書感泣後來歸惟海都不降廷臣有譖伯顏
久居北邊與海都通好者詔以御史大夫玉昔代之乃以
軍授玉昔而行語詳叛王傳三十年冬十二月驛召至自
大同世祖不豫明年正月世祖崩伯顏總百官以聽兵馬
司請日出鳴晨鐘日入鳴昏鐘以防變伯顏呵之曰汝將
爲賊邪其一如平日適有盜內府銀者宰執以其幸赦而
盜欲誅之伯顏曰何時無盜今以誰命而誅之人皆服其
有識成宗卽位於上都大安閣親王有違言伯顏握劍立
殿陛陳祖訓宣願命述所以立成宗之意辭色俱厲諸王
悚然趨殿下拜五月拜太傅錄軍國重事仍知樞密院事
時相有忌之者伯顏語之曰幸送我兩罌美酒與諸王飲
宮前餘非所知也江南三省累請罷行樞密院帝問於伯

顏時已屬疾張目對曰內而省院各置爲宐外而軍民分隸不便帝是之三院遂罷冬十二月有大星隕於東北雨木冰伯顏卒年五十九伯顏深略善斷將二十萬眾伐宋若將一人諸帥仰之若神明下江州時宋臣呂師夔盛飾宗室二女以獻伯顏斥去不顧師入臨安肆不易市畢事還朝歸裝惟衣被而已未嘗言功也大德八年特贈宣忠佐命開濟功臣太師淮安王諡忠武皇慶中賜鈔十萬貫命江浙省臣建廟祀諸臨安至正四年建碑都城之郊賜額曰開國元勳佐命大臣之碑翰林學士元明善撰其文進封淮王子邁的僉樞密院事囊加台樞密副使孫相嘉實禮同僉樞密院事集賢學士至治末省先塋於白只刺山間變赴上都或勸少避之曰我與國同休戚今有難可

避乎至上都果見囚久之得釋尋拜河南江北行省平章
遷江南行臺御史大夫曾孫普達失理皆能世其家

孟祺字德卿宿州符離人父仁業儒有節行北渡寓濟州
兼臺州帥石天祿禮之辟兼詳議府事祺幼敏悟善騎射
侍父徙居東平時嚴實修學校試生徒祺登上選辟掌書
記廉希憲宋子貞皆器遇之間於朝擢國史院編修官遷
應奉翰林文字兼太常博士一時典冊多出其手至元七
年持節使高麗還稱旨授山東東西道勸農副使十一年
丞相伯顏將兵伐宋詔選宿望博學可贊計畫者與俱行
遂授祺行省諮議時軍書填塞祺酬應剖決略無凝滯師
駐建康伯顏以兵事詣闕政無大小祺與執政並裁決之
諸將利虜掠爭趨臨安伯顏問計祺對曰宋人之計急則

必竄閩廣若迫以兵其竄愈速一旦城中盜起臨安三百
年之積焚蕩無遺矣莫若以計安之令彼不懼正如取果
須完取之耳伯顏善其言草書遣人至臨安以安慰之宋
乃不復議遷閩先是宋降表稱姪皇帝屢拒不納祺自請
爲使徵降表至則會宋相於三省夜三鼓議未決祺正色
曰國勢至此夫復何待遂定議書成宋謝太后手批用寶
攜之以出復啟謝太后於內殿取國璽十二送出伯顏將
親封之祺曰管鑰自有主者非所宜預一或不謹恐異時
姦人妄相誣污終不可明遂止江南平伯顏奏祺前後功
多且可任重授嘉興路總管佩虎符在官未久以疾歸東
平至元十八年擢浙東海右道按察使疾不赴卒年五十
一追封魯郡公諡文襄

阿朮

趙璧

昂吉爾

芒兀台

阿朮兀良氏都帥兀良合台子也沈幾有智略臨陳勇決氣蓋萬人憲宗時從其父征西南夷率精兵爲候騎所向摧陷至平大理克諸部降交趾無不在行事見其父兀良合台傳世祖卽位畱典宿衛從征李璫有功拜征南都元帥治兵於汴復立宿州至元初略地兩淮攻取戰獲軍聲大震四年八月觀兵襄陽遂入南郡取僊人鐵城等柵俘生口五萬軍還宋兵邀襄樊間阿朮乃自安陽灘濟江畱精騎五千陳牛心嶺復立虛寨設疑火夜半敵果至斬首萬餘級初阿朮過襄陽駐馬虎頭山宿漢東白河口曰若築壘於此襄陽糧道可斷也五年遂築鹿門新城等堡繼又築臺漢水中與夾江堡相應自是宋兵援襄者不能進

六年七月大霖雨漢水溢宋將夏貴范文虎相繼率兵來
援復分兵出入水岸林谷閒阿朮謂諸將曰此張虛形不
可與戰宜整舟師備新堡諸將從之明日宋兵果趨新堡
至虎尾洲大破之般溺生禽五千餘人獲戰船百餘艘於
是治戰船分水軍築圍城以逼襄陽文虎復率舟師來救
來興國又以兵百艘侵百丈山前後邀擊於湍灘俱敗走
九年三月破樊城外郭增築重圍以逼之宋裨將張順張
貴裝軍衣百船自上流入襄陽阿朮攻之順死貴僅得入
城俄乘輪船順流東走阿朮令諸軍艤船以待然薪照江
兩岸如晝追至櫃門關禽貴餘眾盡死是年九月加同平
章事先是襄樊兩城漢水出其閒宋兵植木江中聯以鐵
鎖中設浮梁以通援兵樊恃此爲固至是阿朮以機鋸斷

木以斧斷鎖焚其橋襄兵不能援十二年奉命略淮東抵揚州城下宋守將呂文煥懼而出降十年奉命略淮東抵揚州城下宋以千騎出戰阿朮伏兵道左佯北宋兵逐之伏發敗去十一年正月入覲與參政阿里海牙奏請伐宋帝命相臣議久不決阿朮進曰臣久在行間備見宋兵弱於往昔失今不取時不再來帝可其奏詔益兵十萬與丞相伯顏參政阿里海牙等同伐宋三月進平章政事秋九月師次郢之鹽山得俘民言宋沿江九郡精銳盡聚郢江東西兩城今舟師出其間騎兵不得護岸危道也不若取黃家灣堡東有河口可由中拖船入湖轉以下江爲便從之遂舍攻郢而去行大澤中忽宋騎兵千人突至時阿朮與伯顏殿後僅從數十騎卽奮槊馳擊追斬五百餘級生禽其將趙范

二統制進攻沙洋新城拔之前次復州守將翟貴迎降時夏貴鎖大艦扼江漢口兩岸備禦堅嚴阿朮用軍將馬福計回舟淪河口穿湖中從陽邏堡西沙蕪口入江十二月軍至陽邏堡攻之不克阿朮謀於伯顏分麾下四翼軍馬以舟載之循岸泝流西上四十里對青山磯而泊是夜雪大作南岸露沙洲令諸舟望洲截江橫渡宋水師都統程鵬飛來拒大戰中流禽斬無算奪船千餘艘鵬飛敗走進抵南岸阿朮率諸將攀岸疾鬪開合數四南軍阻水不得相薄遂起浮梁成列而上出馬於岸復力戰破之追擊至鄂東門而還夏貴聞阿朮飛渡大驚引麾下兵三百艘先遁餘皆潰走遂拔陽邏堡盡得其軍寶伯顏議師所向或欲先取蘄黃阿朮曰若赴下流退無所據不如上取鄂漢

雖遲旬日可以萬全伯顏從之令水陸竝趨鄂漢焚宋戰艦三千艘於江火照城中漢陽鄂州大恐相繼降十二年正月黃蘄江三州降卽率舟師趨安慶范文虎迎降繼下池州宋賈似道擁重兵拒蕪湖遣宋京來請和伯顏謂阿朮曰有詔令我軍駐守何如阿朮曰若釋似道不擊恐已降州郡今夏難守且宋無信方遣使請和而又射我軍船執我邏騎今日惟當進兵事若不利我任其罪二月師次丁家洲遂與宋前鋒孫虎臣對陳夏貴以戰艦二千五百艘橫互江中似道將兵殿後時已遣騎兵夾岸而進兩岸樹礮擊其中堅宋軍陳動阿朮挺身登舟手自持柁突入敵軍諸軍繼進宋兵遂大潰世祖以宋重兵皆駐揚州臨安倚之爲重四月命阿朮分兵圍守揚州庚申次眞州敗

宋兵於珠金沙斬首二千餘級既抵揚州乃造樓櫓戰具於瓜洲漕粟於眞州樹柵以斷其糧道宋都統姜才領步騎二萬來攻柵才軍夾河爲陳阿朮麾騎士渡河擊之戰數合堅不能卻眾軍佯北才逐之遂奮而回擊萬矢雨集才軍不能支禽其副將張林斬首萬八千級七月庚午宋兩淮鎮將張世傑孫虎臣以舟師萬艘駐焦山東每十船爲一舫聯以鐵鎖示必死阿朮登石公山望之舳艫連接旌旗蔽江曰可燒而走也遂選強健善射者千人載以巨艦分兩翼夾射阿朮居中合勢進擊繼以火矢燒其篷檣煙燄漲天宋兵旣碇舟死戰至是欲走不能前軍爭赴水死後軍散走追至圖山獲黃白鷓船七百餘艘自是宋不能軍十月詔拜中書左丞相仍諭之曰淮南重地李庭芝

狡詐須卿守之時諸軍進取臨安阿朮駐兵瓜洲以絕揚州之援故伯顏軍不血刃而平宋阿朮控制之力爲多十三年二月夏貴舉淮西諸城來附阿朮謂諸將曰今宋已亡獨庭芝未下以外助猶多故也若絕其聲援塞彼糧道尙恐東走通泰逃命江海乃柵揚之西北丁邨以扼其高郵寶應之餽運貯粟灣頭堡以備捍禦畱屯新城以逼泰州又遣千戶伯顏察爾率甲騎三百助灣頭兵勢戒曰庭芝水路旣絕必從陸出宜謹備之如丁邨烽起當首尾相應斷其歸路六月甲戌姜才知高郵米運將至果夜出步騎五千犯丁邨柵至曉伯顏察爾來援所將皆阿朮身下精兵旗幟畫雙赤月眾軍望其塵連呼曰丞相來矣宋軍識其旗皆遁才脫身走追般騎兵四百步卒免者不滿百

人壬辰李庭芝以朱煥守揚州挾姜才東走阿朮率兵追襲殺步卒千人庭芝僅入泰州遂築壘守之七月乙巳朱煥以揚州降乙卯泰州守將孫良臣開北門納降執李庭芝姜才奉命戮於揚州市阿朮申嚴士卒禁暴掠有武衛軍校掠民二馬卽斬以徇兩淮悉平得府二州二十二軍四縣六十七九月辛酉入覲世祖於大明殿陳宋俘第功行賞實封泰興縣二千戶二十三年受命北伐叛王昔剌木等明年凱旋繼又西征至哈刺霍州以疾卒年五十有四追封河南王

趙璧字寶仁雲中懷仁人太宗時以薦召至行宮愛其精敏但呼秀才而不名賜三僮給薪水命后親製衣賜之視其試服不稱輒爲損益寵遇無比命馳驛聘四方名士王

鶚等又令蒙古生十人從壁受儒書敕壁以蒙古語譯大學衍義從馬上聽壁陳說辭旨明貫壁年二十有三憲宗卽位召問曰治天下何先對曰請先誅近侍之尤不善者憲宗不悅壁退世祖曰秀才汝渾身是膽邪吾亦爲汝握兩手汗也有斷事官身老瓦赤者持其印請於帝曰此先朝所賜今陛下登極將仍用此舊印邪抑易以新者邪壁侍旁呵之曰用汝與否尙須聖裁乃敢以印爲請奪其印置帝前帝爲默然久之曰朕亦不能爲此其人竟不復用壬子命偕史天澤爲河南經略使承兵亂後復辟前進士楊果陳紀爲佐相與鋤強暴屏盜賊造楮鏹立屯田固邊壘廉郡邑未期而境內治尋從世祖伐宋爲江淮荆湖經略使兵圍鄂州宋相賈似道遣使來願請近臣議和壁請

行世祖曰汝登城必謹視吾旗旗動速歸可也壁登城宋將宋京曰北兵若旋師願割江爲界且歲奉銀絹匹兩各二十萬壁曰上駐濮州未拜旗時若早有是請猶或見從大軍今已渡江是言何益賈制置今焉在邪將與面語京遣人約之未至壁適見軍中旗動迺約再議而還憲宗崩世祖卽位中統元年拜燕京宣慰使時都城連年供給蜀軍府庫已竭及乘輿北征壁稽覈豪貴侵盜逋負錢數十萬計民不擾而軍用足拜中書平章政事三年從親王合必赤討李璫於濟南蒙古漢軍悉聽節制會諸軍乏食壁從濟南稅近地居民麪米羊豕以饋軍軍復大振至元元年帝欲作文檄宋進橐者數不稱旨乃召壁爲之文成帝甚喜曰惟秀才曲盡我意改樞密副使六年宋守臣呂文

德遣開使約降帝命璧詣都元帥阿朮營密議俄同行漢軍帥府事宋將夏貴率兵五萬饋糧三千艘自武昌遡流入援襄陽時漢水暴漲璧據險設伏待之貴果中夜潛上壁策馬出鹿門行二十餘里發伏兵奪其五舟大呼曰南船已敗我水軍宜速進貴懼不敢動明日阿朮至領諸將追騎兵璧率水軍萬戶解汝楫等追舟師遂合戰於虎尾洲貴大敗走士卒溺死甚眾奪戰艦五十禽將士三百餘會高麗王禘爲其臣林衍所逐帝召璧還同國王頭輦哥行東京路中書省事興師問罪師次平壤時衍已死璧密奏高麗避兵江華島餘四十載外雖臣貢終莫肯出由權臣欲倚險以擅王位今衍已憂懼死國王在江華島若朝廷許遣兵護歸使復國於平壤則於字小除姦一舉兩得

上可其奏始移軍島旁島因山繚海城周五百餘里建卻敵樓櫓三之一乃宣德音申約束秋毫不犯島中官吏兵民悉還舊都舉國歸心師還遷中書右丞十年遷平章政事十三年卒贈大司徒諡忠亮

昂吉爾張掖人姓野蒲氏世爲西夏將家父甘卜率所部歸太祖以其軍隸蒙古軍籍仍以甘卜爲千戶主之及卒昂吉爾領其父軍從征諸國有功至元六年授千戶略地淮南所向無前時元兵初南塞馬當暑多疥癘昂吉爾以所部馬入太行療之病良已由是軍中馬病者率以屬焉歲療馬以萬數宋輸糧金剛臺意將深入昂吉爾將兵馳往斷其道因上言河南邊郡與宋對境宋兵時爲邊患唐州東南皆大山信陽在蔡州南南直九里武陽平靖五水

等關宋兵必經諸關入信陽實其咽喉守禦莫急往年金亡朝廷得壽泗襄郢而不畱兵守卒使宋得之請城信陽以扼宋從之城成授信陽軍萬戶佩虎符丞相伯顏渡江畱阿朮定淮南東道其西道則屬之昂吉爾駐兵和州宋淮西制置夏貴遣兵四萬來攻潛兵出千秋澗塞其歸路因出城奮擊大敗之獲人馬千計阿速軍戍鎮巢暴橫激變昂吉爾攻拔其城遂攻廬州降夏貴昂吉爾入廬州城按堵無所犯遷淮西宣慰使宋丞相文天祥復起兵海道舒民張德興應之襲破興國德安諸郡還據司空山詔昂吉爾攻之一戰而定江左初平官制草創權臣阿合馬納賂鬻爵江南官僚冗濫爲甚郡守而下佩金符者多至三四人由行省官舉薦超授宣慰使者甚眾民不堪命昂吉

爾入朝具爲帝言且枚舉不循資歷而驟升者數人帝驚愕謂姚樞等曰此卿輩所知而不爲朕言昂吉爾願言之耶卽命偕哈伯崔斌和魯火孫董文忠減汰之選曹一清仍詔諭江淮軍民俾通知之時兩淮兵革之餘荆榛蔽野昂吉爾請立屯田以給軍餉旣而阿塔海言屯田所用牛農具甚眾今方有事日本若復調發民兵將不勝動搖議遂寢未幾宣慰使燕枏復以爲言帝乃遣數千人卽芍陂洪澤試之果如昂吉爾所言乃以二萬兵屯之歲得米數十萬斛改河南行省參政淮西宣慰使都元帥行尙書省右丞皆兼淮西使帥日本不庭帝命阿塔海等領卒十萬征之昂吉爾疏言曰臣聞兵以氣爲主而上下同欲者勝比者連事外夷三軍屢衄不可以作氣海內騷然一遇

調發上下愁怨不可謂同欲請罷兵息民不從既而師果無功生平好直言雖帝怒甚其辭不少屈後坐事罷官子昂阿圖從征乃顏有功授廬州蒙古漢軍萬戶府達魯花赤暗普海北海南道廉訪使孫教化的世襲千戶

芒兀台蒙古達達爾氏祖塔思火爾赤從太宗定中原有功爲東平路達魯花赤位在嚴實上芒兀台事世祖爲博州路奧魯總管至元七年又爲監戰萬戶佩金虎符八年改鄧州新軍蒙古萬戶治水軍於萬山南岸以兵攻樊拔古城繼敗宋軍於安陽灘轉戰八十里禽其將鄭高大軍攻樊分軍爲五道芒兀台當其一率五翼軍以進焚南岸舟豎雲梯於北岸登櫃子城奪西南角入城命部將據倉粟功在諸將右十一年從丞相伯顏平章阿朮南征命與

萬戶史格率麾下會鹽山嶺遇宋兵芒兀台突陳諸軍繼進敗之自郢州黃家原蕩舟入湖至沙洋堡立礮坐十有二豎雲梯先登焚其樓櫓拔羊角埧破沙洋堡直抵新城鏖戰大敗之宋復州守將翟貴以城降將由漢口入江聞宋兵屯漢口乃率舟師經鬪龍口至沙步入江遇宋兵三百餘艘分道來拒進擊走之次武磯堡宋將夏貴堅守不下阿朮率萬戶晏徹爾史格賈文備同芒兀台四軍雪夜泝流西上黎明至青山磯北岸史格先渡宋將程鵬飛拒敵格被三創喪士卒二百人諸將繼進大戰中流鵬飛敗走舟泊中洲宋兵阻水不得近伯顏復遣萬戶張榮實等率舟師來援夏貴率麾下數千將奔大軍乘之大敗走黃州遂拔武磯堡斬守將王達阿朮軍遂渡南岸伯顏留軍

鎮鄂漢率諸將水陸東下十二年正月遣芒兀台前行招諭斬黃德安安慶池州諸郡皆望風款附次丁家洲宋賈似道孫虎臣來拒芒兀台擊之奪虎臣所乘巨舟與宋降將范文虎以兵五百諭降和州及無爲鎮巢二軍九月攻常州拔其木城擊叛將趙潛於豐登莊復招降湖州行省第其功命行兩浙大都督府事十四年改閩廣大都督行都元帥府事時宋二王逃入海詔與右丞塔出會兵收之次漳州諭降宋守將何清十五年師還福州拜參知政事詔與梭都等行省於福鎮撫瀕海八郡十六年沙縣盜起詔復行省事討平之議令移潭州未幾中書言梭都在福建麾下擾民致南劍等路往往殺長吏叛及芒兀台至招來七十二寨建寧漳汀稍獲安集不當更移他處十八年

轉右丞時宣慰使王剛中以土人饒貲頗擅威福芒兀台慮有變奏移之他道二十一年拜江淮行省平章政事初宋降將五虎陳義嘗助張弘範禽文天祥助完者都討陳大舉又資阿塔海征日本戰艦三千福建省臣言其有反側意請除之芒兀台攜義入朝保其無事伯顏亦以爲言乃授義同知廣東道宣慰司事授明珠虎符其從者林雄等十人竝上百戶二十二年以言者召赴闕封其家貲遣使按驗無狀未幾拜行省左丞相還鎮江浙二十三年征日本請募島民販私鹽者爲水工從之役旣罷請以戰艦付海漕又言省治在杭州其兩淮江東財賦軍實旣南輸至杭復自杭北輸京城往返勞頓不便請移省治於揚州復言淮東近地宜置屯田歲入糧以給軍所餘餉京師帝

悉從之詔江淮管內竝聽芒兀台節制二十六年朝廷以中原民轉徙江南令有司遣還芒兀台言其不可遂止閩越盜起詔與不魯彌什等合兵討平之以病召還二十七年以江西平章奧魯赤不稱職特命爲丞相兼樞密院事出鎮江西在官四十日卒芒兀台之在江浙專復自用又易置戍兵變更伯顏阿朮成法帝每戒敕旣死臺臣劾郎中張斯立罪狀而芒兀台迫死劉宣及其屯田無成事始聞於帝云子三人帖木不花孛蘭奚襲萬戶亦刺出中書參知政事

阿里海牙

史格

阿里海牙

身一作涯

畏兀人初生胞中剖而出父以爲不祥將

棄之母不忍比長聰辯有膽略家貧嘗躬耕舍耒歎曰大

丈夫當垂功竹帛何至稿項馱馱去求北庭書

卽畏兀讀文字

之一月而盡用薦者言得事世祖漸見擢用由左右司郎中遷參議中書省事至元五年命僉河南行省事與阿朮劉整取襄陽始帝之遣諸將也命毋攻城但圍之以俟其自斃乃築長圍起萬山包百丈楚山盡鹿門堡俾南北不相通又築峴山虎頭山爲一字城聯互諸堡爲必取計城中糧儲多呂文煥拒守五年終不下九年三月破樊城外郭其將復閉內城堅守阿里海牙以爲襄陽之有樊城猶齒之有脣也宜先攻樊城樊城下襄陽可不攻而得乃入奏帝報可會西域人獻新礮法挾之來軍中立礮攻樊城破之先是宋兵作浮橋以通襄陽之援阿里海牙發水軍焚其橋襄援不至城乃拔旣而移攻具向襄陽一礮中其

譙樓城中洵懼多踰城降者阿里海牙身至城下與文煥折矢爲誓文煥感而出降遂與入朝帝以阿里海牙行荆湖樞密院事鎮襄陽因奏自古荆襄用武之地今漢水上游已爲我有宜乘勝順流長驅宋必可平會阿朮入覲力贊其議詔益兵十萬拜伯顏爲行省左丞相阿朮爲平章阿里海牙進右丞同伐宋十一年九月會師襄陽遂破郢州及沙洋新城師由沙蕪口入大江宋夏貴守諸隘甚固阿里海牙麾兵攻武磯陽邏等堡貴趨援阿朮遂以兵西渡青山磯鄂州降伯顏與諸將會鄂城下議曰鄂襟山帶江爲江南要區且兵糧皆備今蜀江陵岳潭皆未下不得一大將鎮撫其地上游一動則鄂非我有矣乃分兵四萬遣阿里海牙戍鄂州而自與阿朮將大兵東下阿里海牙

集鄂民宣上德意禁將士毋侵掠民大悅遣人徇壽昌信陽德安諸郡皆下阿里海牙言江陵地居上游宋倚之爲重鎮若非乘此破竹之勢取之待江水泛溢鄂漢之城恐亦難守帝從其請進徇江陵與宋鄂州安撫高世傑遇於洞庭湖兵船成列而陳阿里海牙督諸翼水軍屯東岸而自帥兵左右夾擊世傑敗走追至桃花灘力屈而降誅之遂下岳州至江陵縱火焚其柵宣撫朱禕孫制置高達恐卽以城降遂入城釋繫囚放戍券軍除其徭役及法令之繁苛者傳檄歸峽鼎澧隨辰沅靖郢復均房施荆門及諸徭洞無一梗阻以江陵地圖來上請曰荊州西距梁益南控交廣據江淮上游爲要地非朝廷重臣開大府以鎮之未足以收新附來遠人帝覽奏喜語近臣曰伯顏兵東下

阿里海牙以孤軍戍鄂朕方憂之恐荆蜀連兵順流猝至
今荆南既定吾東兵可無後患矣卽命平章廉希憲出鎮
江陵促阿里海牙急還鄂且以沿江諸城新附者委之比
至鄂爲書招潭州守將李芾不聽阿里海牙以舟師至因
決隍水部分諸將以礮攻破其木堡流矢中胸創甚督戰
益急奪其城潭人復作月城拒守十三年正月芾力屈自
殺軍民數萬人盡爲阿里海牙所屠廬舍樓櫓悉成灰燼
惟存一帥署由是郴全道桂陽永衡武岡寶慶袁韶南雄
諸州郡守臣皆望風驚悸各奉表降獨知邕州馬瑩守靜
江不下阿里海牙貽書許以廣西大都督瑩焚書斬其使
靜江以水爲固乃築堰斷大陽小溶二江以遏上流決東
南地以涸其隍城破瑩被執阿里海牙以靜江民易叛尤

非潭比悉坑之斬墜於市分遣萬戶脫溫不花徇賓融柳
欽橫邕慶遠齊榮祖徇鬱林貴連象脫鄰徇潯容藤梧皆
下宋特磨道主儂士貴南丹州牧莫大秀皆奉表求內附
奏官其土官分兵戍諸要害自還潭州既而宋二王稱制
海中雷瓊全永與潭屬縣民文才喻周隆羅飛賀十二咸
起兵應舒黃蘄相繼亦起詔命討之且略地海外阿里海
牙既誅才喻等至雷州使人招諭瓊州安撫趙與珞不聽
遂自航海五百里至白沙口執與珞冉安國黃之紀宋史作傑
裂殺之盡定瓊南寧萬安吉陽諸地降八番羅甸諸蠻以
其長文龍兒入見置宣慰司十六年入覲獻金三千五百
兩白金五萬三千兩南臺御史大夫相威檢覈阿里海牙
所俘男婦得三萬二千餘口帝命盡放爲民相威復奏阿

里海牙占降民一千八百戶爲奴自置吏責其租賦阿里海牙謂征行所得帝曰如果降民宜速還有司若征行所得令御史臺籍其數量賜有功者十八年奏請徙省鄂州所定荆南淮西江西海南廣西之地得州凡五十八洞徭山獠不可勝計所至殺戮立威民不堪命二十一年四月親行海濱收集占城潰卒同鎮南王脫歡征交趾敗績於萬劫江僅以身免還朝加湖廣左丞相自陳其功比伯顏當賜養老戶御史滕魯瞻劾其矜功邀賞阿里海牙自辨有旨逮魯瞻赴行臺質問相威曰爲臣敢爾欺誑邪御史何罪奏釋之未幾卒追封楚國公諡武定後桑葛專政遣其黨要束木鈞攷荆湖錢穀乃籍其家貲送至京

論曰曹彬下江南兵不血刃而曹翰上游專制盡屠江州

伯顏下江南亦不戮一人而阿里海牙獨屠潭州屠靜江甚至江陵宣撫朱禕孫制置高達已降尙戮其妻此武夫屠伯之常不足深怪而議者反訾阿里保全潭民稱其未嘗專事殺戮此蓋碑誌僅據其家狀爲言故舛錯若是至舊史修於異代有何諱忌而亦依樣胡盧則何用斧鉞爲哉

史格字晉明天澤長子憲宗賜天澤以衛城授格節度使憲宗崩格北畱謙州五年而歸爲鄧州舊軍萬戶旣又代張弘範爲亳州萬戶而以故所將鄧州舊軍授弘範從攻襄陽襄陽下眾軍渡江平章阿朮將二十五萬戶居前每五萬戶擇一人爲帥統之格居其一格軍先渡爲宋將程鵬飛所卻格被三創喪其師二百尋復大戰中流矢鵬飛

身亦被七創乃敗走其後樞密院奏格輕進請罪之帝念其功而薄其罪俾從平章阿里海牙攻潭州礮激柵木傷肩矢貫其手裏創先登拔之遂以軍民安撫畱戍從攻靜江眾以賴輜自蔽鑿城格所當礮礮蔽地車不可前乃伺隙率眾攀堞蟻附而上又拔之徇廣西十三州廣東三州皆下溪洞諸夷來降者五十州授廣南西道宣慰使宋亡後其大將張世傑挾益王昷廣王昺據福州立益王傳檄嶺海欲復其地詐言夏貴已復瀕江州郡諸戍將以江路既絕不可北歸皆託計事還靜江格曰君等亦爲虛聲所懼邪待貴踰嶺審不可北歸吾與諸君取塗雲南而歸未爲不可敢輒棄戍哉行省議棄廣東之肇慶德慶封州併兵戍梧州格曰棄地徹備示敵以怯不可宜增兵戍之劇

賊蘇仲集潰卒據鎮龍山稱王外掠內耕聞大兵至則僞
出降官軍畏暑不敢深入橫象賓貴四州皆被其害格築
堡於其界守以土兵乘閒火其廬蹂其稻仲窮蹙遂降益
王餘眾破潯州害守將靜江北抵泉永皆城守永州被圍
凡七月格分兵赴之解其圍益王死衛王立趣廣州避海
中崖山遣曾淵子據雷州進兵攻走之世傑將兵數萬復
圍雷州城中絕糧士以草爲食格漕欽廉高化諸州糧以
餉之世傑解圍去旣而宋衛王死廣東西悉平屢遷江西
湖廣右丞進平章政事卒子耀福建行省平章榮鄧州舊
軍萬戶

董文炳

子士元

弟文蔚

阿剌罕

董文炳字彥明俊之長子也少孤母李有賢行嚴於教子

文炳兄弟從師警敏強記自幼儼如成人以父任爲橐城令明於聽斷上下欽服縣貧重以旱蝗而徵斂日重文炳捐私穀數千石民得以寬前令因軍興稱貸於人取息歲倍以民蠶麥償之文炳以田廬若干畝計直償其貸復以閒田與貧民耕之數年流離漸還民食以足朝廷初料民令敢隱實者誅籍其家文炳使民聚口而居少爲戶數由是賦斂大減民皆富完旁縣有訟不得直者皆詣文炳求決或讒之大府欲中害之文炳卽棄官去癸丑秋世祖在潛藩受命征大理文炳率壯士四十六騎從行人馬道死殆盡至吐蕃止餘兩人徒步從行躑躅道路取死馬肉續食日行不能二三十里會使者遇之還奏其狀世祖遣其弟文忠解尙廐五馬載糗糧迎文炳旣至世祖閱勞甚厚

有任使皆稱旨由是日親費用事從伐宋至淮西臺山寨命文炳往取之文炳馳至寨下免胄諭以禍福遂降之師次陽邏堡其地扼長江天險宋兵傾國死守文炳言兵法先聲有奪人之心願假戈船先諸軍渡江以奪其氣率弟文用文忠載勁卒數百以從鼓櫂疾趨徑薄南岸三戰三捷命文用輕舟報捷世祖方駐香鑪峯扶鞍起立豎鞭仰指曰天也且命他師毋解甲旦日畢渡會憲宗崩班師世祖卽位命文炳宣慰燕南諸道還奏擾攘之後危疑尙多宜大赦以安反側從之中統二年授侍衛親軍都指揮使三年李璫反濟南文炳會諸軍圍之璫不得遁久之賊勢日蹙文炳乃抵城下呼璫愛將田都帥曰反者璫耳餘來卽吾人毋自取死也田縋城降眾遂亂禽璫以獻璫兵有

沂漣兩軍二萬餘皆勇而善戰主將怒其從賊配諸軍使
陰殺之文炳當殺二千人言於主將曰彼爲瓊所脅耳今
盡戮之恐乖天子不殺降之詔主將從之然他營所殺已
大半皆大悔瓊伏誅山東猶未靖乃以文炳爲山東東路
經略率親軍以行出金銀符五十聽給有功者文炳至益
都畱兵於外從數騎冠裳而入居府不設警衛召瓊故將
吏立之庭諭以朝廷德意赦其誅誤且陳金銀符待有功
得便宜除授所部大悅山東以安至元二年以文炳爲鄧
州光化行軍萬戶河南等路統軍副使奏造戰艦五百習
水戰預謀取宋方略帝欲大發河北民兵攻宋文炳曰河
南密邇宋境人習江淮地利不如使河北耕以供軍河南
戰以闢地俟宋平則河北長隸兵籍河南削籍爲民如是

爲便又將校素無俸給連年用兵至有身爲大校出無馬
乘者請頒將校俸錢以秩爲差皆從之七年改山東路統
軍副使治沂州沂與宋接境鎮兵仰內郡餉運有詔和羅
本部文炳不發詔而遣使入奏曰敵人接壤知吾虛實一
不可邊民供頓甚勞重苦此役二不可困吾民以懼來者
三不可帝立罷之十年遷樞密院判官行院事於淮西築
正陽兩城夾淮相望以綴襄陽擣宋腹心十一年拜參知
政事夏霖雨水漲宋淮西制置使夏貴帥舟師十萬來攻
矢石雨下文炳登城禦之飛矢貫臂脇文炳拔矢授左右
發四十餘矢箛中矢盡顧左右索矢又十餘發矢不繼力
亦困不能張滿遂悶絕幾殆明日水入外郭士卒卻避貴
乘之壓軍而陳文炳起束創手劍督戰于士選以戈擊貴

部將獲之以獻貴遂去不敢復至是歲大舉兵伐宋丞相伯顏自襄陽東下十二年正月文炳自正陽會伯顏於安慶降其守將范文虎文炳言大軍既疲於陽邏堡請以所部兵當前鋒伯顏許之走宋相賈似道於蕪湖次當塗拔采石三月詔以天暑命伯顏軍駐建康文炳軍駐鎮江時揚州真州堅守不下常州蘇州既降復叛張世傑孫虎臣約真揚兵誓死戰真揚兵戰每敗不敢出世傑等陳大艦萬艘碇焦山下勁卒居前文炳身犯之乘輪船建大將旗鼓居中二子士選士表戈船翼之大呼突陳諸將繼進飛矢蔽日戰酣短兵相接兩軍皆殊死鬪聲震天地自寅至午宋師大敗世傑東走入海俘其甲士萬餘人悉縱不殺獲戰船七百宋人舉國震恐十月諸軍分三道進文炳居

左由江陰循海趨臨安所過民不知兵凡獲生口悉縱遣之威信前布皆望旗而服海寇張瑄有眾數千倚島爲雄遣士選招降之得海舶五百十三年正月師次鹽官再招之不下將佐議屠之文炳曰縣去臨安不百里聲勢相及臨安已有成約吾輕殺一人則害大計況屠一縣邪遣人諭降之遂會伯顏於臨安城北張世傑欲以其主航海文炳繞出城南屯浙江亭世傑計不行乃挾宋主弟吉王昞廣王昺南走宋主焜遂降文炳入城罷宋官府散其諸軍封庫藏收圖籍禮器璽符交伯顏上之伯顏以宋主入覲有詔留後事一委文炳禁戢豪猾撫慰士女宋民不知易主時翰林學士李槃奉詔招宋主至臨安文炳謂之曰國可滅史不可沒宋十六主有天下三百餘年其太史所記

具在史館宜悉收以備典禮乃得宋史及諸注記五千餘冊歸之國史院宋福王與芮赴京師徧以重寶致諸貴文炳卻不受及官錄與芮家具籍受寶者惟文炳無名拜中書左丞時張世傑奉吉王昞據台州閩中亦爲宋守敕文炳進兵所過禁士馬毋踐田麥曰在倉者吾旣食之在野者汝又踐之民何以續命次台州世傑遁諸將先俘州民文炳下令曰台人首效順於我我不暇有故世傑據之其民何罪敢有擅俘者以軍法論凡縱免者數萬口溫州未下其守將焚城遁文炳亟命滅火追禽其將數其殃民罪斬以徇旣逾嶺漳泉建寧邵武諸郡皆送款閩平十四年帝在上都適北邊有警欲親將北伐正月急召文炳於臨安比至上都請從征帝曰朕召卿意不在是豎子盜兵朕

自撫定山以南國之根本盡以託卿粹有不虞便宜處置以聞省院事無大小咨卿而行文炳避謝不許至大都更日直中書平章阿合馬方恃寵用事生殺任情惟畏文炳爲之少斂嘗執筆請署省案文炳以樞密不署中書案再四不肯署或問其故文炳曰主上所付託者在根本之重非文移之細且吾少徇則濟姦不徇則致譏譏行則身危深負付託本意吾是以預其大政而略其細務也十五年夏以疾奏請解機務詔赴上都命僉書樞密院事中書左丞如故八月天壽節賜宴文炳以功臣坐宗室大臣上九月卒贈平章政事諡忠獻文炳居家孝友居母喪哀毀骨立教諸弟如嚴師雖貴顯如文用文忠不命不敢坐裘馬金帛皆共之有萬石君風子士選孫守簡別見世祖文臣

傳

士元一名不花字長卿文炳長子少從名儒受學及長善騎射中統初以供奉內班從車駕巡狩北方襲叔父文蔚職爲千夫長丞相伯顏克江南宋兵保兩淮未下士元數與戰拔淮安堡從行省阿里攻揚州駐師灣頭堡阿里素不習兵率輕騎數百出堡士元與別將哈刺圖以百騎從之揚州守將姜才乘隙來攻日暮宋兵至者萬餘士元方整陳欲戰阿里趣令左旋已乃遁去士元與哈刺圖以部兵赴敵泥淖馬不能馳乃棄馬步戰至四更敵眾始退及旦阿里來視戰地見士元臥泥中身被十七創甲裳盡赤肩昇至營而絕年四十有二哈刺圖亦戰死江淮旣平伯顏入朝言於帝曰淮海之役所損者二將而已帝問其人

以士元與哈刺圖對帝曰不花健捷過人晝戰必能制敵
夜戰而死甚可惜也追封趙郡公諡忠愍

文蔚字彥華文炳次弟也重厚寡言勤讀書兼善騎射文
炳爲橐城令家務悉委之辛丑起民兵南征文炳命率十
有七人私整鞍馬衣甲自爲一隊與眾軍渡淮甲寅世祖
收大理還駐六盤山文炳以文蔚孝謹公勤可任解所佩
金符以讓帝嘉賞之授橐城等處行軍千戶南鎮鄧州與
荆襄接壤沿邊城壁未築是年冬修光化明年立昆陽又
明年築棗陽文蔚悉總之親其勞苦不鞭笞而事集丁巳
攻樊城樊城南據漢北阻湖師不得渡文蔚夜領兵士於
湖水隘處立椿竇薪草頃之梁成至曉畢渡圍遂合復統
拔都軍前行奪其外城論功居取己未憲宗伐宋入川蜀

文蔚奉詔將鄧兵西上率將士挾雲梯冒飛石崎嶇戰釣魚山帝賞賚之中統元年世祖置武衛軍文蔚以鄧兵入爲千戶畱屯上都三年李璫反據濟南文蔚以麾下軍圍其南面經時力戰城破奏功還至元五年卒於上都弟文忠時爲樞密僉院乞護喪南還帝甚憫之泰定中追封隴西郡伯

阿剌罕札剌爾氏祖撥徹初事太祖爲火爾赤兼爲博爾赤一官掌服御弓矢一官主飲膳也太宗時從征隴北陝西有戰功父耶柳干從皇子闊出忽都虎南征累功授萬戶遷天下馬步禁軍都元帥又代大將察罕益德統大軍攻淮東西諸郡兩世皆死於戰阿剌罕襲父職改上萬戶至元十二年權行中書省參知政事明年行江東道宣慰

使又明年入覲遷行省左丞進右丞仍宣慰江東十八年
入覲拜中書左丞相行中書省事征日本次明州卒方歲
己未從世祖渡江破宋師於隆興北山中統初討叛黨阿
藍荅渾都海於河西明年扈征叛王阿里不哥於幕北又
明年從宗王平李瓊於濟南四役皆有功至元四年觀兵
襄陽明年圍之越六年克之走宋師安陽灘綴宋師百丈
山十一年略地江北奪郢州南門堡獻盪舟之策渡沙蕪
取鄂州遂別略壽昌統左翼軍順流東下十二年入建康
與右丞相伯顏左丞董文炳分軍三道取宋阿剌罕將右
軍發建康與宋師戰屢敗之破東垣拔溧陽建平罕將右
安長興闢獨松關前後斬首萬五千級十三年三軍會於
杭宋亡徇浙東降趙提刑等五百餘人追襲宋軍至福安

僵尸四十里殺步帥李世達俘秀王與釋監軍趙由瑒防禦使林德降安撫使王吉分軍興化禽宋參政陳文龍降宋官二百餘人淮兵三千人江南遂平子拜降襲職卒弟耶速迭爾襲以萬戶領蒙古軍鎮守河南文宗以懷王由江陵入繼大統道過汴梁召耶速迭爾以其軍扈從北上進平章政事天祿改元知樞密院事帥兵屢拒上都之軍於通州昌平居庸關復禦陝西兵於廣平磁州遷河南江北行省平章兼山東河北蒙古軍大都督詔加贈其祖父三代皆曹南王敕國史臣虞集碑其神道而許有壬碑其

神堂

道園文錄
至正集

張弘範

張弘範字仲疇柔第九子也善馬槊能詩歌年二十時兄

順天路總管弘略上計壽陽行都畱弘範攝府事吏民服其明決蒙古軍所過肆暴弘範杖遣之入其境無敢犯者中統三年授行軍總管從討李璫於濟南柔戒之曰圍城勿避險地地險則己無懈心兵必致死主帥慮其險苟有來犯必赴救可因以立功勉之弘範營城西璫每出軍侵突獨不向弘範弘範曰我易受攻而敵不至必以奇兵來襲我也遂築長壘濠內伏甲開東門以待之夜浚濠倍其深廣璫不知也明日果擁飛橋來攻未及岸陷濠中其得跨濠而上者突入壘門遇伏皆死璫既誅朝廷懲璫以藩鎮專兵民之權故能爲亂議罷大藩子弟之在官者弘範例罷至元元年弘略旣入宿衛復授弘範順天路管民總管佩金虎符二年移守大名歲大水漂沒廬舍微服出行

察民疾苦而除革之又輒免其租稅朝廷罪其專擅弘範請入見進曰臣以爲朝廷儲小倉不若儲之大倉帝曰何說也對曰今歲水潦不收而必責民輸倉庫雖實而民死亡殆盡明年租將安出曷若活其民使不致逃亡則歲有恆收非陛下大倉庫乎帝善之六年括諸道兵圍宋襄陽朝廷以益都兵乃李瓊所練勇悍難制故授弘範益都淄萊等路行軍萬戶命屯鹿門堡斷宋餉道以絕郢援弘範言今規取襄陽周於圍而緩於攻者計待其自斃也然夏貴乘江漲送衣糧入城而我不能禦其境南接江陵歸峽商旅士卒道出襄陽南者絡繹不絕寧有自斃之時乎宜城萬山以斷其西柵灌子灘以絕其東庶幾敵可坐困帥府奏用其言乃移弘範兵戍萬山一日與將士較射出東

門宋兵奄至眾寡不敵將佐請入城自守弘範曰敵至不戰何以示威卽擐甲上馬遣偏將李庭當其前他將六百人攻其後親率二百騎爲長陳步兵閒陳而待令曰聞吾鼓則進未鼓勿動宋軍步騎相閒突陳弘範嚴陳不動再進再卻弘範鼓之前後奮擊宋師奔潰八年築一字城進逼襄陽破樊城外郛九年攻樊城流矢中其肘裹瘡見主帥曰襄樊水陸二軍相爲唇齒故不可破若截江道斷其水軍之援而全力攻樊樊必破樊破則襄陽亦下矣從之明日復率銳卒先登拔之十一年丞相伯顏伐宋弘範率左部諸軍循漢江東略郢而南拔武磯堡渡江爲大軍前鋒宋相賈似道阻兵蕪湖殿帥孫虎臣據丁家洲弘範轉戰而前諸軍繼之宋師潰長驅至建康十二年五月次瓜

洲分兵立柵據其要害揚州都統姜才以勁兵二萬出楊子橋都元帥阿朮禦之夾水而陳弘範以十三騎徑度衝之陳堅不動弘範引卻有驍將回紇人鎧仗甚異躍馬揮大刀出陳直趨弘範弘範旋轡回槩殪之合軍歡呼震地敵人奪氣進師薄之眾潰亂追至城門斬首萬餘級自相蹂藉溺死過半宋將張世傑孫虎臣等悉其水軍而陳於焦山南北決戰弘範以一軍從旁橫衝之宋師遂敗追至圖山之東奪戰艦八十俘馘千計上其功賜號拔都改亳州萬戶亳軍張柔舊所統也從中書左丞董文炳由海道會伯顏進次近郊宋主上降表以伯姪爲稱往返未決弘範將命入杭城數其大臣之罪皆屈服竟取稱臣降表來上十三年台州復叛其守將殺使焚書及城破或請屠之

弘範但誅其首而已十四年師還授江東道宣慰使是時
宋丞相文天祥陳宐中張世傑等立益王昞於福州閩粵
響應爲董文炳塔出及梭都等所敗走廣州會昞歿世傑
等復立衛王昺於海中厓山尙有船七百艘衆十餘萬十
五年命弘範爲蒙古漢軍都元帥往平之辭曰漢人無統
蒙古軍者乞以蒙古信臣爲首帥帝曰一軍二帥號令不
一不許賜錦衣玉帶弘範辭請賜劍甲帝出武庫劍甲聽
其自擇且諭之曰不用令者以此劍處之將行薦李恆爲
己貳從之至揚州選將校水陸二萬分道南征由閩入粵
以弟弘正爲先鋒弘正驍勇旣踰嶺所向克捷進攻三江
寨寨據隘乘高不可近因連兵向之寨中持滿以待弘範
令下馬治朝食持滿者疑不敢動而他寨不虞也忽麾軍

連拔數寨回擣三江盡拔之至漳州軍其東門命別將攻南門西門乃乘虛破其北門拔之鮑浦寨南瀕海弘範先斷其走水之路而後攻陸又拔之福建瀕海郡邑皆望風下獲宋丞相文天祥於五坡嶺十六年正月庚戌由潮陽港入海辛酉次厓山山南北互二百餘里宋建行宮於山麓環以千艘碇海中建樓櫓其上橫爲一陳隱然如城堞船尾皆向外爲死守計於是不可攻人而止可受人之攻弘範引舟師赴之厓山東西對峙其北水淺舟膠非潮至不可進乃繞山之東南入大洋始得逼其舟時元兵皆海艘無哨船不能趨利故世傑得以輕舟往來樵汲自如及李恆以廣州哨艇至遂斷其汲道燒其宮室宋兵每日惟潮平時有淡水取汲舟中糧可支半載弘範遣使諭降世

傑覆請退屯廣東一道以奉趙氏宗廟不許二月癸未將戰或請先用礮弘範曰礮攻則舟散我分追不利不如聚而殲之也明日四分其軍軍其東南北三面李恆軍北面弘範自軍南面相去里餘下令曰宋舟附山潮退必東遁南軍急邀之勿令得去西北軍聞吾樂作乃戰平旦先麾北面軍乘潮而戰不克會潮退水南瀉北面軍順流衝擊突入其陳李恆命轉柁尾溯行徑擣其柵憑高瞰敵兩軍殊死戰矢石蔽空塵至日午潮長水北流南面軍復順水勢進攻世傑腹背受敵元軍預濡氈覆艦以禦火礮而以幙障舟尾戰樓伏士負盾約聞金聲始起戰敵大集不動俄樂作敵疑宴而懈我軍已及其舟而敵矢將盡鳴金徹障弓弩火石交發頃刻連奪其七大舟血戰自已至申聲

震大海宋師大潰宋臣陸秀夫負其主昷赴水死獲其符璽印章世傑以十六艦奪港遁李恆追至高州大洋不及世傑走交趾大風壞其舟死海陵得其戰艦七八百尸浮海面十餘萬嶺海悉平磨崖勒石紀功於厓山之陽而還十月入朝賜宴內殿慰勞甚厚未幾疾病沐浴易衣冠扶掖至中庭面闕再拜退坐命酒作樂與親故言別出所賜劍甲命付嗣子珪曰汝父以是立功汝佩服勿忘也語竟端坐而卒年四十有三弘範將家子而讀書知大誼伯顏會諸將於建康出庫金頒賞弘範後至伯顏詰以軍法後至者誅弘範笑曰臨戰不敢後受賞恥居先也眾皆歎服獲文天祥使拜不屈待以賓禮獲宋禮部侍郎鄧光薦命子珪師之簿錄宋內庫金帛時夾谷士常預焉其後多所

遺失或疑士常私匿欲攷驗之弘範謂士常名士行義有素願以官爵家帑保其無他既而其誣果白延祐六年加保大功臣追封淮陽王謚獻武子珪別見中葉言臣傳

李恆

李恆字德卿其先世爲西夏國主太祖經略河西有守兀納刺城者夏主之子也城陷不屈而死子惟忠方七歲求從父死主將異之執以獻皇弟合撒爾大王畱養之從經略中原有功以達魯花赤佩金符監淄川王分地遂爲淄州人惟忠生恆恆生而穎異王妃嘗子之李瓊反漣海恆從其父棄家入告變瓊怒繫恆闔門於獄瓊誅始得出世祖嘉其忠至元七年授益都淄萊新軍萬戶從伐宋圍攻襄樊十一年從丞相伯顏濟漢渡江遂從大軍東下十二

年春宋將高世傑復窺漢沔仍遣恆還鄂州諭江陵降其
生口十餘萬悉縱爲民復從右丞阿里海牙至洞庭禽高
世傑下岳州進拔沙市畱鎮守江陵未幾徙鎮常德以扼
湖南之衝俄有詔分三道出師伯顏自將擣臨安以右丞
阿里海牙鎮鄂徇湖廣而以恆爲左副都元帥從都元帥
遜都台出江西九月於江州開元帥府下撫瑞建昌臨江
吉州遂定贛南安宋廣東經略徐直諒納其所部十四郡
前江西制置黃萬石亦以邵武降計南踰嶺海北盡長江
東西際閩湘其收郡縣百有五十得戶三百萬明年宋丞
相陳宜中及其大將張世傑立益王昀於閩中右丞相文
天祥亦自會昌以眾屯邵武沿海郡縣豪傑吳浚等爭起
兵應之恆遣將破吳浚兵於南豐世傑遣都統張文虎與

浚合兵十萬期必復建昌恆復遣將敗之兜港浚走從文天祥於瑞金又破之天祥走據汀恆遣兵復汀州旋爲天祥所陷行收兵出興國連破諸邑圍贛州尤急恆乃分兵援贛自率精兵潛至興國擊走之及諸空坑降其眾數萬軍中有得天祥與建昌故吏民書諸將欲借此盡籍誅諸富戶事連數百家恆悉焚其書人心乃定或欲發吉州天祥祖墓恆曰豈有王師發人祖墓之理會詔至令與右丞阿刺罕左丞董文炳合兵追益王眾皆謂宜趨福建恆謂若諸軍俱赴福建彼必竄廣東以撼江西不如從廣東夾攻之果遇宋兵於梅嶺敗之乃遁走碭洲十四年拜參知政事行省江西十五年宋益王殂其樞密張世傑陸秀夫等復立衛王昺守廣東諸郡移屯海中厓山距廣州四百

里詔恆以蒙古漢軍副都元帥經略之時都元帥張弘範舟師未至恆分遣諸將略定梅循英德清遠走王道夫擊凌震於海上獲其船三百艘禽將吏二百餘人又破其餘軍於菱塘十六年二月弘範至自漳州其圍厓山弘範督南面軍恆督北面軍合擊大敗之嶺海平十七年拜中書左丞行省荆湖凡虜男女奴鬻者罪之獵戶之籍於官者千戶之外悉放散之十九年從皇子鎮南王征交趾奪天長府其王舉國航海恆將舟師追之敗諸海洋獲船二百始恆議城天長儲餉待戰奪於眾議不果既而盛夏軍中疾作霖潦盲營議班師命恆殿後且戰且行至永平關賊伏毒弩貫恆膝負創奪關出境毒發卒於思州年五十後贈滕國公諡武愍柳貫撰其廟碑

見待制集

博羅歡

焦德裕

博羅歡畏荅爾幼子蘸木曷之孫瑣魯火都之子也時諸侯王及十功臣各有斷事官博羅歡年十六爲本部芒忽斷事官從世祖討阿里不哥數有功中統三年李璫叛命帥芒忽一軍圍濟南分兵掠益都萊州悉平之詔錄燕南獄讞決明允皇子雲南王愛哥赤爲其省臣寶合丁毒死事覺中書擇可治其獄者奏上四人皆不稱旨丞相線真以博羅歡聞帝可其奏博羅歡以年少不知書辭乃以吏部尙書別帖木爾輔其行未至雲南寶合丁密以金六籊迎餽博羅歡以其握兵微外拒之恐致變陽諾曰吾藥不能容待歸取之至則竟其獄誅毒王者而歸其金於省授昭勇大將軍右衛親軍都指揮使大都則專右衛上都則

兼三衛會伐宋授金吾衛上將軍中書右丞詔分大軍爲
二右軍受伯顏阿朮節度左軍受博羅歡節度俄兼淮東
都元帥竝以山東軍隸焉遂軍於下邳召將佐謀曰清河
城小而固與昭信淮安泗州爲犄角猝未易拔海州東海
石秋三城遠在數百里外必不嚴備吾頓大兵爲疑兵以
輕騎倍道襲之其守將可禽也師至三城果皆下清河亦
降宋主以國內附而淮東諸城猶爲之守詔博羅歡進軍
拔淮安南堡戰白馬湖及寶應掠高郵入漕河援灣頭斷
通泰援兵遂下揚州淮東平益封桂陽德慶二萬一千戶
十四年討叛臣只里幹台於德昌平之與博羅同署樞密
院事拜中書右丞行省北京未幾召還時江南新附尙多
反側詔募邊民能從大軍進討者使自爲一軍聽節度於

其長博羅歡奏曰今疆土寔廣勝兵百萬指揮可集何假此無藉之徒彼一踐南土則橐其貨財妾其婦女民畏且仇叛將愈眾奏上會常德入朝訴唐兀一軍殘暴其境內一如所言敕斬以徇於是所募軍皆罷十八年以中書右丞行省甘肅二十四年諸王乃顏叛帝將親征博羅歡諫曰昔太祖分封東諸侯其地與戶臣皆知之以二十爲率乃顏得其九芒忽氏兀魯氏扎刺爾氏弘吉刺氏亦赤烈思氏五諸侯得其十一惟徵五諸侯兵自足當之何至上煩乘輿臣疾且愈請東征帝賜鎧甲弓矢鞍勒命督五諸侯兵與乃顏戰敗之賊黨塔不帶以兵來拒會久雨軍乏食諸將欲退博羅歡曰兩陳相對豈容先動俄塔不帶引兵退師乘之轉戰二日博羅歡身中三矢大破之適太師

月魯那演大軍來會遂平乃顏禽塔不帶旣而其黨哈丹復叛詔與諸侯王乃馬台討之哈丹游騎猝至博羅歡從三騎返走抵絕澗可二丈許追騎垂及博羅歡策其馬一躍而過三從騎皆歿人謂有神助云哈丹死斬其子老的於陳往返凡四歲凱旋俘哈丹二妃以獻敕以一賜乃馬台一賜博羅歡陳其金銀器於延春閣上召諸侯王將帥分賜之博羅歡辭帝嘉其讓更賜金銀器五百兩以旌之改河南行中書省平章政事有詔括馬毋及勳臣之家博羅歡先入善馬十八爲倡汴南諸州葬爲巨浸博爾歡躬行決口督有司繕完之三十一年成宗立入朝請以泰安州所入五戶絲四千斤易內庫緡帛分給芒忽一軍帝爲敕遞車送軍中竝賜以世祖所佩弓矢盤帶有頃近臣奏

伐宋時右軍分屬伯顏阿朮左軍分屬博羅歡今伯顏阿朮皆受分地而博羅歡未及帝曰何久不言乃益封高郵五百戶大德元年叛王藥木忽爾及兀魯速不花來歸博羅歡聞之遣使馳奏曰諸王之叛皆由其父此輩幼弱無所與知今茲來歸宜棄其前惡以勸未至帝深以爲然賜金鞍勒拜江浙等處行中書省平章政事居歲餘卒年六十三博羅歡勇有智略戰嘗以身先之所獲財物悉與將士故得其死力平居常以國事爲憂聞變卽請行至終其事乃止其忠義出於天性累贈太師上柱國加封泰安王諡武穆姚燧碑其神道長子渾都山東宣慰使遙授中書平章政事三子埜先河南江北等處行中書省左丞相季子博羅陝西等處行中書省平章政事埜先子尼摩星吉

襲郡王亦思制瓦性吉中政使其仲子伯都幼穎異不以家世自矜長嗜書史至大二年出爲江南行臺御史中丞延祐元年拜甘肅行省平章政事時米價騰踊陸輓每石費二百緡乃爲經畫省四百餘萬緡自是諸倉俱充溢甘肅州氣寒地瘠少稔歲發粟振饑春則貸種於是兵民兼足詔賜名鷹甲冑弓矢及鈔五千緡以勞焉四年移江浙行省平章政事入爲太子賓客上書陳古先聖王正心修身之道帝嘉納之遷江南行臺御史大夫皇太后謂東宮官不宜使外止其行遂以疾辭去寓居高郵英宗卽位復命爲江南行臺御史大夫陛見以疾固辭命以平章祿歸養於家復賜鈔十萬緡所服藥須空青詔遣使江南訪求之伯都固辭所賜鈔及祿泰定元年還京師卒朝廷知其貧

賻鈔二萬五千貫御史臺奏賻三萬五千貫仍還所辭祿妻弘吉刺氏弗受曰恐非伯都意也子篤爾吉將作院判官

焦德裕字寬父雄州人父用仕金爲千戶守雄州北門太祖兵至州人開南門降用猶力戰生獲之帝以其忠壯釋不殺復舊官徇地山東未嘗妄殺一人年六十二卒德裕通左氏春秋少拳勇善射從其舅解昌軍中金將武仙殺眞定守史天倪仙旣敗走其黨趙貴王顯齊福等保仙故壘數侵掠太行太宗擇廷臣有才辯者往招之楊惟中以德裕薦遂使眞定降齊福禽趙貴王顯亡走德裕追射殺之其地悉平詔賜井陘北障城田中統四年授閬蓬等處都元帥府參議宋臣夏貴圍宣撫使張庭瑞於虎嘯山寶

薪土塞水源人無從得飲德裕往援夜薄貴營令卒各持
三炬貴驚走追及鵝谿賊千人獲馬畜兵仗萬計從丞相
伯顏南征授僉行中書省事遂從下安慶至鎮江焦山寺
主僧誘居民叛丞相阿朮欲盡坑其徒德裕諫止之乃入
城撫定其眾平章阿合馬譜丞相伯顏殺丁家洲降卒奏
以德裕爲中書參政欲假一言證成之德裕辭不拜改淮
東宣慰使淮西賊保司空山檄淮東四郡守爲應元帥帖
哥邈得其檄卽械郡守許定國等四人使承反狀將籍其
家德裕言四人者皆新降天子旣寵綏之有地有民尙何
他覲柰何信反聞殺無辜邪盡復其官拜福建行省參政
卒年六十九贈平章政事追封恆國公諡忠肅

塔出

梭都百家奴

塔出布兀刺子也幼孤長善騎射至元元年入侍世祖占對多稱旨四年給以察罕食邑賦稅之半又還其所俘逋戶三十七年降金虎符授山東統軍使鎮莒密膠沂鄆郯宿卽墨等城設方略謹斥候宋人不敢北向九年改僉樞密院事數將兵攻下瀕淮堡柵略地漣海獲人畜萬計請加賞賚降人蔣德勝以勸來者十年城正陽以扼淮海諸州兵宋陳奔率安豐廬壽等州兵數撓其役塔出選精銳日十數戰奔遁去卒城正陽宋人復造戰艦於六安欲攻正陽塔出率騎兵焚其艦餽饗久不繼出兵據險潛取安豐麥以餉軍出奇兵破宋軍於橫河口十一年朝議淮上諸郡宋之北藩城堅兵精不可猝下攻之徒老我師宜先渡江擣其根本畱兵淮甸絕其救援庶長江可乘虛而渡

於是以塔出爲淮西行省參政帥師攻安豐廬壽等州俘生口萬餘來獻宋夏貴率舟師十萬圍正陽決淮水灌城幾陷帝遣塔出往救之遇宋兵於潁州時城中戍卒僅數百塔出卽發公庫弓矢驅市人出戰急徙北關民入城伏兵以待是夜宋人果焚北關火光屬天塔出率眾從暗中射之矢下如雨宋軍退走追至沙河大破之溺死不可勝計明日長驅直走正陽時方盛暑乘大雨突圍入城遂堅壁不出旋與右丞阿塔海分帥銳師以出渡淮至中流皆殊死戰宋軍大潰追數十里斬首數千級奪戰艦五百餘遂解正陽之圍秋八月引兵渡淮屯廬揚間十二年從丞相伯顏以舟師東下宋相賈似道奔揚州遂分兵四出克池州取太平順流至建康丹徒江陰常州皆望風迎降謀

告揚州人將夜襲丹徒塔出設伏以待揚州軍果夜至塔
出扼西津邀擊之殺獲溺死者甚眾授淮東左副都元帥
十三年領淮西行中書省參政時沿淮諸州新附塔出禁
侵掠撫瘡痍練士卒備姦宄境內帖然俄遷江西都元帥
征廣東宣布恩信所至溪洞納款十四年宋益王昞廣王
昺走保嶺海復授江西宣慰司行中書省事遷治贛州十
五年以二王事入議帝命張弘範李恆總兵進討塔出畱
後以供軍費初江西甫定帝命墮其城塔出表言豫章諸
郡皆瀕江爲城霖潦泛溢無城必至墊溺墮之不便帝從
之州郡有已降復叛者塔出謂同僚曰撫治乖方之所致
也中間豈無註誤止誅其渠魁盡釋餘黨瑞州張公明愬
左丞呂師夔謀爲不軌塔出廉知其誣曰狂夫欲脅求貨

耳若以矇昧言遽聞之朝廷則大獄滋興連及無辜且師
夔居相職詎肯爲狂妄之事若遲疑不決恐彼驚疑乃斬
公明而後奏聞帝是之十七年入覲卒於京師年三十七
子二人長宰身江西宣慰使次必宰身征東行省左丞
梭都扎刺爾氏少入宿衛從征花馬國有功李瑄叛山東
從諸王合必赤平之還言於朝曰郡縣惡少年多從閒道
鬻馬於宋境乞免其罪籍爲兵從之得兵三千人以千人
隸梭都爲千戶命守蔡州至元五年阿朮等兵圍襄陽命
梭都出巡邏奪金剛臺諸寨六年拒宋將范文虎舟師於
灌子灘九年攻樊城先登城遂破襄陽降再與卒五千賜
弓矢襲衣金鞍白金等物入見擢郢復等處招討使十一
年從大軍渡江鄂漢降十二年建康降改建康安撫使攻

平江嘉興皆下之帥舟師會伯顏於皋亭山宋平詔伯顏以宋主入朝畱參政董文炳守臨安令其自擇可副者文炳請畱梭都從之時衢婺諸州皆復起兵文炳使梭都往守嚴州以鎮之至嚴方十日而衢婺徽連兵來攻皆戰卻之復婺衢處州又攻建寧府松溪縣懷安縣皆下之十四年升福建道宣慰使行征南元帥府事聽參政塔出節制塔出令梭都取道泉州泛海會於廣州之富場時邵武方聚兵觀釁信州告急梭都趨建寧遇宋兵於崇安軍容甚盛令其子百家奴及楊庭璧等夾擊之竝分設二伏以待庭璧陷陳深入宋兵敗走伏兵起邀擊之斬首千餘級宋丞相文天祥南劍州都督張清合兵將襲建寧梭都夜設伏敗之轉戰至南劍敗張清奪其城至福州王積翁以城

降攻興化軍矢石雨下乃造雲梯礮石攻破之巷戰終日
斬知軍陳瓚屠之而南至漳州先遣百家奴往會塔出自
畱攻漳州斬首數千級知府何清降攻潮州不下梭都恐
失富場之期乃舍之而去十五年至廣州塔出令還攻潮
時知府馬發城守甚備梭都塞塹填濠造雲梯鵝車日夜
急攻潮人潛出城焚之二十餘日不能下梭都令於眾曰
有能先登者拜爵增秩總管兀良哈耳先登諸將繼之戰
至夕宋兵潰潮州平進福州行省參政徵入見帝以江南
既定將有事於海外升泉州行省左丞招諭南夷諸國十
八年改占城行省右丞十九年率戰船千艘出廣州浮海
伐占城占城迎戰兵號二十萬梭都率敢死士擊之斬溺
死者五萬餘又敗之大浪湖斬首六萬占城降梭都造木

爲城闢田以耕伐烏里越里諸小夷皆下之積穀十五萬以給軍二十一年鎮南王脫歡征交趾詔梭都帥師會之敗交兵於清化府奪義安關脫歡命梭都屯天長以就食與大營相距二百餘里俄有旨班師脫歡引兵還梭都不知也交趾使人告之弗信及至大營則空矣交兵遮之於乾滿江梭都戰死事聞諡襄愍子百家奴亦從攻襄樊從渡江東下屢立戰功授武略將軍賜金符爲管軍總管鎮高郵白馬湖行省以百家奴襲父職郢復州招討使建康宣撫使仍領本翼軍頃之徇地福建行定衢婺信等州城邑與畚軍遇疾戰敗之鼓行而東降建寧府攻拔南劍州閩清懷安二縣傳檄而定從下福州破興化別擊東華鄉張世傑軍於泉州俄領諸軍乘戰船入海追逐世傑於惠

州甲子門進至同安縣荅關寨瀕海縣鎮悉招下之降其
戰船三千餘艘至元十四年冬十二月宋二王遣倪宙奉
表詣軍門降遂進兵至廣州諸郡縣以次降附明年春正
月振旅而還廣東遂平三月引宙奉降表來朝未至賜虎
符管軍萬戶七月遂朝於上都授海外諸蕃宣慰使兼福
建道市舶提舉仍領本翼軍守福建是時福建多水災百
家奴出私錢市米以振貧民全活甚眾十七年朝京師加
宣慰使都元帥二十二年父梭都戰死交趾百家奴遂與
脫歡引兵薄交趾境水陸轉戰輒有功武宗至大四年卒
於家

烏古孫澤

烏古孫澤字潤甫臨潢人讀書舉大略才幹過人世祖將

取江南澤以選輸鈔至淮南餉軍丞相阿朮見而奇之補
淮東大都督府掾至元十四年從元帥梭都下兵閩越時
宋廣王遁於海聚兵甲子門其將張世傑攻泉州興化守
臣陳瓚舉郡應之文天祥置都督府於南劍州守臣張清
行都督府事謀復建寧閩中郡縣往往復從宋江東大擾
梭都時軍浙東建信復告急梭都謀於眾曰我軍當何先
澤曰彼據閩廣而我往浙右非策之善譬之伐木務除其
根當先向南會行省檄梭都與左丞塔出會兵甲子門遂
度兵閩關八戰而至南劍殺其守臣張清宋師遂退冬十
月收福州進攻興化拔之梭都怒其民反覆下令屠城澤
屢諫不聽乃復說曰世傑不虞我軍遽至方急攻泉州謀
爲基本我新得泉州民志未固旦暮且失守比我定興化

整兵而南彼基本將日固矣莫若開其遺民使走泉南扇動之世傑將膽落而走是我不戰而完泉州捷於分兵之馳救也梭都喜開南門縱民脫去世傑得逃民知興化已破乃解泉圍去梭都至泉州部署別將裝大艦趨甲子門自將下漳州屯海豐引精騎與塔出會十二月入廣州十五年春還擊潮州守將馬發備禦甚固澤曰潮人城守不下恃外多壁壘爲援應也第剪其外應必內潰乃分兵攻一大壘破之餘壘盡散走二旬而潮拔旣而文天祥軍潰江西廣王暨世傑死海中梭都還軍福建以梭都爲福建行省參政澤行省都事授興化行總管府事民歌舞迎候於道郡新殘於兵掩骼卹孤流離復業誅惡少之竄名卒伍者貪暴始戢始陳瓚以郡應張世傑民多戰死至是吏

援例將籍其產澤曰國家至仁誅止陳瓚從瓚者猶蒙宥民奈何連坐下令田廬貨產無主者竝給其族姻有司無所與當江南未定盜賊四起民自相什伍保衛鄉里及諸路平行省議籍爲兵上下洶洶澤白行省曰國兵非少今籍民以示少非所以安反側也且當籍者眾民或有他心議遂格澤又興學校召長老諸生講肄經義行鄉飲酒禮至元二十一年調永州路判官湖廣平章政事要束木貪虐誅求或妄言初歸附時州縣長吏斂富戶銀將輸之官銀已具而事遂中止要束木卽下令責民自實使者旁午隨地置獄株連蔓引瘐死載道所獲不貲要束木盡掩有之有使至永澤戒吏美供帳豐酒食務順適其意使者感愧無所發其毒因閒以利害曉之一郡由是獲安是歲盜

起寶慶武岡皆永旁郡也行省遣澤討平之俘獲五百餘人簡出其誑誤者止誅首惡三十一人餘得減死二十六年丞相桑葛建議攻校錢穀務求增羨天下騷動澤自上計獨守舊額要東木怒拘繫之明年桑葛敗要東木伏誅澤始得釋二十九年湖廣平章政事闊里吉思薦澤才堪將帥以行省員外郎從征海南黎軍還授廣西兩江道宣慰副使僉都元帥府事兩江荒遠瘴癘與百夷接不知禮法澤作司規三十有二章以漸爲教又省廠置二十二所以紓民力歲饑發象州賀州官粟三千五百石以振饑者先發而後上聞邕管徼外蠻數爲寇澤循行並徼得阨塞處布畫遠邇募豪民四千六百餘戶置雷雷那扶十屯列營堡以守之陂水墾田築八埭以節瀦洩得稻田若干頃

歲收穀爲軍儲邊民賴之海北元帥辭赤干賊利事覺行省檄澤驗治盡發其奸賊縱所掠男女五百口牛數千頭金銀器物稱是海北之民大怖御史臺言烏古孫澤奉使知大體如汲長孺爲將計萬全如趙充國可屬大任詔擢爲海北海南廉訪使視事三月例收圭田租米五百石量食而入餘悉委學官給諸生以勸業常曰士非儉無以養廉非廉無以養德身一布袍數年妻子樸素無華宴如也雷州地近海潮汐蓄其東南陂塘鹹病農而西北廣衍平袤宜爲陂塘澤行視城陰乃教民浚故湖築大堤塌三溪濬之爲斗門七堤塌六以制其贏耗醜爲渠二十有四皆支別設牐時其啟閉得良田數千頃瀕海廣瀉竝爲膏土至大元年改福建廉訪使以母年踰八十求歸養長沙歲

餘母喪以哀毀卒妻杜以夫死飲食不入口者十有三日不死乃復食澤謚正憲子良禎仕至中書右丞別見元末言臣傳

劉整

以下宋降臣

劉整字武仲先世京兆樊川人徙鄧州穰城沈毅有智謀熟知山川險要避金亂入宋隸荆湖制置使孟珙麾下珙攻金信陽整爲前鋒夜從驍勇十二人渡塹登城襲禽其守還報珙大驚曰唐李存孝率十八騎拔洛陽今整所將更寡乃書其旌曰賚存孝累遷潼川十五軍州安撫副使整以北人鎮西邊有功南方諸將皆出其下呂文德忌之會俞興與整有隙使之帥蜀以圖整興以軍事召整不行遂摺摭其罪

宋史新編云會賈似道託會計邊費以陷諸閩帥整遂爲興所按

整遣使訴

臨安不得達益懼不自保乃謀納款中統二年夏籍瀘州

十五郡戶三十萬入附

綱鑑大全云整命參謀官許彪孫草表不從合門仰藥死世祖

嘉其來授夔府行省兼安撫使俞興攻瀘州整出寶器分

士卒激使戰戰數十合興敗去復遣使請益屯兵厚儲積

爲圖宋計明年入朝授行省於成都潼川兩路仍兼都元

帥同列嫉其功謀陷之整懼請分帥潼川宣課茶鹽以餉

軍至元四年入朝奏言宋主弱臣恃立國一隅今天啟混

一之機臣願效犬馬勞先攻襄陽徹其扞蔽廷議多難之

整曰自古帝王非四海一家不得爲正統聖朝有天下十

七八何置一隅不問而自棄正統邪且襄陽吾故物由棄

而弗戍使宋得竊築爲強藩若復襄陽浮漢入江則宋可

平也世祖曰朕意決矣命陝西五路四川行省各造戰艦

五百付整俾與阿朮經略襄陽遂城鹿門堡及白河口率兵五萬抄掠沿江諸郡七年三月築實心臺於漢水中上置弩礮下爲石圍五以扼敵船且與阿朮計曰我精兵突騎所當者破惟水戰不如宋耳更造戰船日練水軍雖雨不能出亦畫地爲船習之得練卒七萬復築外圍以遏敵援宋襄陽帥呂文煥登城觀敵整躍馬前曰君旣昧天命又不自奮厲徒多害生靈何爲請與君決勝負文煥不答伏弩中整以甲堅不得入九年破樊城外郭謀知文煥將遣張貴出求援遂分部戰艦縛草如牛狀臨漢水縣互參錯眾莫測所用九月貴果夜乘輪船順流下走覘知之傍岸蒸草牛如畫整與阿朮麾戰艦先據龍尾洲轉戰五十里禽貴於櫃門關殲其眾宋封整爲燕郡王遣永寧僧齋

告身及金印牙符送整所永寧令得之聞于朝敕張易姚
樞雜問適整至自軍言宋怒臣用兵襄陽故設此爲殺臣
計臣實不知帝令整復書謂宋若果以生靈爲念當重遣
信使請命朝廷願爲此小數何益時襄陽拒守已五年整
計襄樊唇齒也宜先攻樊城宋以柵蔽城斬木列置江中
貫以鐵索整募善泅者斷木沈索督戰艦趨城下以回回
礮擊之而焚其柵明年正月遂破樊城旣而移攻具向襄
陽整欲立碎其城執文煥以快意主帥不可乃遣宋俘唐
永堅入諭文煥以城降整入朝奏曰襄陽破則臨安搖矣
若遣水軍乘勝長驅大江必非宋有遂改整行淮西樞密
院使守正陽夾淮而城南逼江斷其東南衝宋夏貴悉水
軍來攻破之大人洲時右丞阿里海牙鎮淮西帝知其不

相能命分軍爲二各統之御史言江淮未附將帥需人今
首用阿里海牙子忽失海牙劉整子垓素不知兵且闕人
望帝竝命罷去十二年正月詔整別將兵出淮南整銳欲
渡江曰大軍自襄樊東下宋悉力西拒東方虛弱徑造臨
安可一鼓而捷也首帥不可曰吾受詔特綴東兵使無西
爾渡江非所聞也整帥騎兵攻無爲軍久不克初元兵南
下用呂文煥與整爲鄉導至是整不得行而文煥預入鄂
之功捷至失聲曰首帥束我願使我功後於人善作者不
必善成果然一夕憤死於無爲城下諡武敏

呂文煥

范文虎

襄陽居吳楚上游立國東南者恆恃爲藩蔽襄陽不守則
浮漢東下長江天塹皆失其險宋南渡紹興間岳飛收復

襄陽屹然爲西陲保障越百餘年疆事壞於趙范而襄陽歸於元嘉熙間孟珙又復之訓兵積粟以與元抗復成重鎮越二十餘年而又壞於呂文煥兄弟襄陽失而宋遂不支有金湯之險無干城之良不能守也文煥安豐人兄文德微時鬻薪於市宋淮帥趙葵見其遺履長尺有咫異之招致麾下累功授京湖安撫制置使知鄂州時劉整獻計謂宋人所恃惟文德耳然可以利誘乃遣使至鄂遺以玉帶求置榷場於樊城文德許之旣而言安豐等場貨每爲盜所掠願築土牆以護居積遂築壘置堡江心起萬人臺立撤星橋以遏宋南北之援時出兵哨掠襄樊城外兵威言熾文德始悟爲整所賣每日誤國家者我也疽發背死文煥於宋咸淳三年知襄陽府兼京西安撫副使時世祖

至元四年也命阿朮等經略襄陽文煥庸懦無謀樊城之初置榷場也已隱據其堂奧而文煥泄泄處之及阿朮城白河築鹿門文煥始大懼不知所爲計恃兵食尙敷坐擁堅城遷延歲月以幸無事無致死之志旦夕喋血以爭要害也聞宋廷臣議遣高達來援文煥不擇用其客計虛奏大捷以止之賈似道亦素忌高達而庇呂氏竟不遣達六年世祖命史天澤益兵圍襄陽深溝高壘期於坐困長圍四合餉援盡斷文煥每一巡城南望痛哭而已十年正月阿里海牙等拔樊城世祖降詔諭文煥曰爾等拒守孤城於今五年宣力爾主固其宜也然勢窮援絕其於數萬生靈何若能納款悉赦勿治且加遷擢旣而阿里海牙身至城下喻之折箭與之誓文煥感泣遂納管箚出降詔入朝

授侍衛親軍都指揮使卽爲帝畫攻鄂策且請爲前鋒世祖以文煥爲襄漢大都督十一年二月授參知政事行省荆湖命率其麾下臨城以善遇降將意招諭未下州郡十月文煥引兵攻破沙洋城執守將王大用總管王虎臣殺之進逼新城招都統邊居誼不從伏弩中其右臂馬仆幾被獲眾挾以出文煥怒磨兵拔其城居誼赴火死元軍渡江圍鄂文煥謂權守張晏然等曰汝國所恃者長江耳今大軍飛渡如履平地不降何待於是晏然與都統程鵬飛皆以軍州降十二年正月兵至尋陽提舉江州興國宮呂師夔文德子也與知江州錢真孫以州降時宋方趣文煥兄五郡鎮撫呂文福將兵入衛文福不受命殺使者亦迎降於江州宋謝太后遣使諭文煥請息兵修好不聽十月

伯顏分兵三道取臨安以文煥爲鄉導趨常州宋遣兵部侍郎呂師孟來軍中議和師孟亦文德子也陰請文煥贊成和議亦不省十二月平江府官屬迎降於常州文煥先往受其降十三年伯顏軍次皋亭山宋主奉表稱臣伯顏遣文煥入臨安閱視城壘且齎黃榜安諭中外軍民并入慰謝太后文煥因使人上表謝而出有曰茲銜北命來抗南師視以犬馬報以仇讎非曰子弟攻其父母不得已也尙何言哉伯顏拘文天祥於軍中天祥讓伯顏失信文煥從旁解喻天祥斥其合族爲逆文煥大慚恚十四年以文煥爲中書左丞仍宣慰江東十五年三月詔文煥遣官招宋生熟券軍月給衣糧汰其老弱者屯種近地江東道按察使阿八赤從文煥求金銀及宅舍子女不與遂奏文煥

私匿兵仗帝命行臺御史大夫相威詰之阿八赤以不直免官二十三年正月文煥以江淮行省右丞請老許之仍任其子爲宣慰使文德子師夔從徇江西平廣州官至參政初文德詔事賈似道似道暱之爲之奧援并擢用其子弟呂氏部曲布列沿江諸郡襄陽旣降元軍所至率先款附反戈前驅馴至人心風靡巨解不可復振而宋遂以亡

其國云

○原彙無傳以類編參補

范文虎者呂文德壻也宋景定初世祖自鄂北還宋相賈似道虛奏援鄂解圍之功以文德爲首加檢校少傅文虎亦進黃州武定諸軍都統制及文德卒似道擢文虎爲殿前副都指揮使總禁軍寄腹心焉時宋度宗咸淳五年也是年文虎與夏貴率師援襄樊貴屺於新城虎尾洲文虎

以舟師援之至罐子灘而敗七年四月與阿朮戰於湍灘
又敗六月文虎將衛卒及兩淮舟師十萬進至鹿門阿朮
遣軍趣會舟灘文虎前軍逆戰不利輒棄旗鼓夜遁八年
宋民兵都統張貴將自襄陽突圍還郢先遣死士潛行水
中達郢乞文虎發兵駐龍尾洲爲應至期張貴乘舟順流
夜犯重圍轉鬪至龍尾洲而郢兵先二日以風水驚疑退
屯三十里貴力戰不支被執不屈死論者謂張貴能以偏
師犯圍入襄陽復能破圍而出當日范文虎諸將苟協力
致死徹襄陽南面之圍以通餉援則猶可守也先是宋以
李庭芝爲荆湖制置大使督援師文虎不甘爲之下致書
似道似道卽改文虎官爲福州觀察使不屬京湖制使統
轄而令文虎兵獨從中制文虎日與妓妾擊鞠飲宴庭芝

屢約進兵文虎輒以取旨未至爲辭旣而襄樊陷給事陳
宐中言襄樊之失皆由文虎怯懦逃遁請斬之似道不許
止降一官知安慶府御史陳文龍言文虎失襄陽猶使知
安慶府是當罰而賞也請罷之似道大怒黜文龍至元十
二年正月伯顏分兵至江州文虎遣人以酒饌迎犒且速
伯顏往伯顏初以安慶城在山頂且兵糧皆足勢不可攻
又慮文虎爲勍敵甚憂之及聞欲降大喜乃使阿朮以舟
師先至安慶文虎遂以城降伯顏承制遙授兩浙大都督
命持詔往諭壽州諸鎮招安豐五河等處軍民宋謝太后
諭文虎使通和議文虎不報十月董文炳將左軍由江入
海以文虎爲鄉導趨澈浦華亭十三年正月伯顏分兵圍
安吉文虎致書知州趙良淳誘之降良淳斬其使而自經

元兵入臨安宋駙馬都尉楊鎮奉益廣二王潛渡錢塘江如婺州文虎將精兵五千追之不及執鎮而還伯顏以臨安爲兩浙大都督府命文虎與忙兀台同治事宋宗室趙孟朵謀起兵紹興事泄被執至臨安文虎詰其謀逆孟朵諾曰賊臣負國厚恩其危社稷我帝室之冑欲一刷宗廟之恥乃反以爲逆邪文虎怒斬之七月與呂師夔並參知政事十五年進左丞詔諭行省東南島嶼諸番國有慕義者可因番舶宣布德意使其來朝文虎遣使偕日本僧齋詔往諭其國并招降海寇賀文達十七年入朝命將兵十萬同右丞相阿剌罕同征日本十八年七月軍至平壺島遇颶風壞舟文虎被溺漂流一晝夜幸附敗版得生遂擇堅艦乘之棄士卒十餘萬於五龍山下盡爲日本所殲逃

歸者僅三人二十四年帝親征乃顏命文虎將衛軍五百鎮平灤爲策應文虎以豪懿東京諸地人心未靖奏立遼陽行省撫治之時江淮平章沙不丁議裁南官帝曰除范文虎陳巖呂師夔數人餘從所議世祖於諸降臣眷遇始終不衰而心實薄之嘗問曰汝曹何降之易邪

以類編補附

夏貴

夏貴溧陽人朱寶祐開貴城築荆山剋期集事升正任刺史尋兼河南招撫使景定元年兀良合台由潭州還兵而北賈似道用劉整計命貴邀殺其殿卒七百餘人於白鹿磯時世祖自鄂班師似道遂以大捷鄂州解圍奏進貴知淮安州兼京東安撫副使三年貴克復蘄縣改知廬州淮西安撫副使五年擢四川安撫制置使知重慶府率師攻

虎嘯山張庭瑞堅守逾月不克焦德裕來援夜薄貴營貴驚走爲追兵所敗於鵝溪咸淳元年貴以軍五萬攻潼川與守將劉元禮戰卻至蓬溪復大戰敗績四年遷沿江制置使兼知黃州五年援襄陽失利於虎尾洲九年遷淮西制置使兼知廬州十年率舟師十萬乘夏霖雨淮水溢攻正陽水入外郭部將先登被俘遂退軍聞伯顏自襄陽東下軍次漢陽之蔡店貴以戰艦萬艘與都統制王達分據陽邏堡沙蕪口諸要害以阻元軍入江之路貴方往來應援阿朮已由青山磯乘間渡江貴大驚遽以麾下三百艘先遁沿江縱兵大掠還廬州而陽邏堡遂破王達領所部兵八千及定海水軍統制劉成俱戰死鄂州漢陽相繼降元明年正月貴引兵會賈似道於蕪湖袖中出一編書示

似道曰宋麻三百二十年似道俛首而已二月似道以精銳七萬餘人盡屬步軍指揮使孫虎臣軍於池州下流之丁家洲貴以戰艦二千五百艘橫亘江中似道將後軍軍魯港貴既失利於鄂恐似道功成無所逃罪又忌虎臣新進出己上殊無鬪志虎臣前鋒將姜才方接戰虎臣遽過其妾所乘舟眾見之謹曰步帥遁矣貴不戰而走以扁舟掠似道船呼曰彼眾我寡勢不可支似道聞之錯愕失措遽鳴鉦收軍宋師大潰似道夜駐珠金沙召貴計事貴曰諸軍已膽落吾何以戰遂解舟去奔還廬州似道與虎臣單舸走揚州是役也似道以首輔出師朝野屬望傾府庫以供金帛輜重舳舻相銜百餘里抽諸路精兵十三萬益以貴淮閩之師決存亡於一戰而似道權奸流毒中外將

士解體貴復陰幸其敗以誤之軍聲一墮大江以南遂無立草是年宋猶以貴知廬州加樞密副使命與淮東制置副使知揚州朱煥互調貴不奉詔尋加兩淮宣撫大使不數月伯顏兵至臨安貴遂籍淮西二府六州四軍三十四縣戶五十一萬三千八百口百有二萬一千三百降時至元十三年二月也初伯顏命阿朮定淮東以淮西屬之萬戶昂吉爾俾駐和州進攻廬州貴以書抵伯顏曰毋費兵力攻奪邊城若行都歸附邊城焉往伯顏遣貴甥持諭與約至是舉所部納款伯顏承制以貴爲淮西安撫使有洪福者貴家僮也從貴積勞知鎮巢軍貴旣降招福不聽使其從子往福斬之元兵攻城久不拔貴至城下好語紿福請單騎入城福信之門發而伏兵起執福父子屠其城貴

泣殺福及其二子大源大淵十五年與范文虎竝爲中書
左丞貴自降後閱三歲而歿有題其墓者曰享年八十三
胡不七十九惜其年垂耄耄猶復偷生旦莫閒畱貳臣之
名於沒世欲蓋而章不如速死之爲愈也○原稟無傳以類編補
論曰春秋書三叛人名以懲惡而勸善其人皆以土地歸
魯魯史直書其事不少諱焉劉整呂文煥夏貴畱夢炎之
徒身爲將相大臣乃亦趨降恐後無復媿恥不章其惡則
賊臣接踵豈尙有所顧忌哉○論今補

元史卷二十九終